


彙纂功過格

吳建勳  
敬題



BJ  
1548  
H85  
1879  
v.1



光緒五年己卯淦西蘭室吟館重梓

彙纂功過格兼註釋

板存江西省甲戌坊乙藜齋  
如有印刷施送者不取板資



序

君子之爲善也盡其所當爲而  
已非有所希報於天也其去惡  
也絕其所不可爲而已非有所  
懼禍於神也然在易曰積善之



家必有餘慶積惡之家必有餘殃書曰惠迪吉從逆凶惟影響又曰上帝不常作善降之百祥作不善降之百殃則福善禍淫之說自古志之其理固不可誣



也今夫無所慕而爲善無所畏  
而不爲惡者天下一人而已執  
此以例天下之衆吾知其必不  
能也強其所必不能而卒使天  
下之爲善者少爲不善者多則



何如明告以不可誣之理引之  
以所慕而惕之以所畏之爲得  
也功過格之爲書也其來已久  
自袁氏了凡力行有效盛稱述  
之遂以布行於世好脩之士因



而推廣其說斟酌重輕其條目  
愈詳而義例愈備用以進人爲  
善而戒人爲惡何其深切著明  
也今夫人孰不知善之可貴惡  
之當懲也然所知者善惡之異



名焉耳若夫就當前日用之行  
而別其孰爲善孰爲惡孰爲近  
於善而實非孰爲不期惡而已  
犯其間毫釐疑似之辨鮮不昧  
昧焉於是乎有善之所在而漫



置之惡之所在而冒處之者多  
矣其安可不予之鑑照而令其  
知所決擇乎今功過格之所載  
其於善惡之分辨之至確晰之  
至精一寓目間而趨舍之途可



以了然於心循是而用力焉猶  
有不純乎善而或陷於惡者吾  
未之見也是編之輯誠云詳備  
其梓而行之者則雲間好義之  
家聚衆力而成之者也余觀其



所載多古今聖賢之精義微言  
間有所發明亦皆合於經傳之  
旨足以扶倫紀正人心而偕斯  
世於大道非類夫二氏所云因  
果報應之說怪僻而淺陋也賢



者能盡其道雖至於聖人無難  
其不能者兢兢弗違亦不失爲  
寡過之士若乃非笑其說以爲  
拘迂而忽焉弗講者不免於小  
人之無忌憚而已矣更有剽取



其說徒用責人而不知反己所  
求於人者重而所以自待者輕  
此亦下愚之流而君子之所深  
惡也願觀是書者虛心求焉反  
躬體焉庶不負編輯者之意而



# 世道亦重有賴也夫

## 甬上陳錫嘏謨

天下之啟人沈迷長人才德救人災難增人福利最益人者莫如好書如小學近思錄名臣言行錄朱子全書二程遺書大學衍義薛文清讀書錄陽明輯要三編五種遺規迥吉錄吾師錄朱文端十三種藏書人生必讀願體集悅心集父師善誘法農政全書傳家寶福惠全書吏治懸鏡佐治藥言六事箴言汪志伊荒政輯要飭州縣條規在官法戒錄學治臆說太平廣記資治新書江西政要三魏文集異談可信錄宋賢事彙齊民要術皇朝經世文編湯文正遺書呂新吾諸集高忠憲諸集日知錄尊生八牋康濟錄人譜明儒學案洗心輯要各種性理諸儒語錄諸家經濟類書各家家訓吏治教化農桑地利理財倉儲水利弭盜救荒等書及感應陰騭科名顯報各種勸善書書名多見於五種遺規皇朝經世文編讀書樂趣簡明目錄身世金箴勸善全書祈查閱訪買并勸人買閱自有一冊報或訪大利濟書板之漫漶者未行者刊刻其功更大至淫詞小說存留即是禍胎如祈速焚燬耐自立軒敬錄



重梓功過格彙纂緣起

是書彭凝祉先生稱其與經史  
相表裏至老讀之不厭

搏曩於

元宰必讀觀先生室慾篇末自  
跋云云卽思得覩是書而無由  
按先生江蘇長洲人名定求康



熙丙辰會狀孫名啟豐雍正丁  
未會狀科甲綿遠列清班而登  
顯仕者代不乏人則奉是書之  
有益信而可徵竊念功過格之  
爲書自袁了凡先生後桐城姚  
龍懷先生撰功過格拈案先曾



祖念堂公纂功過格輯要俱久  
行世而是書則搏未見以江右  
無板也咸豐壬子館會垣承

前邑侯靳錫銘先生持贈後攝  
金谿泰和學篆暨就外館必攜  
奉案頭亦冀鍼砭已過而已光



緒戊寅夏蘭室館及門彭生煥  
庭楊生夢巖欲劇金重梓廣爲  
流通商之同學楊生斗垣等十  
數人有同心各量力伙助核字  
數共五十八萬有奇頁數壹千  
有奇所費不貲恐難遂願適



邑侯謝選門夫子因公至鄉慫  
憑是舉謂是書可佐

聖天子化民成俗捐廉表率樂輸者  
遂源源焉彭生仙友復囑其弟  
崑山於湘江匯貲迄己卯秋鐫  
板三百千文之數將符爰付刷



氏是科仙友膺鄉薦計偕北上

仲冬搏就高安縣署館明府

黃樸齋年丈與湟川廣文李雲

客先生見是書亟稱之復助刷

貲本年七月始蒞事彭生等問

序於搏誌厥成搏以原刻陳公



序推闡盡致毋庸復贅第思是  
書重壽棗梨端有自來非得

謝選門師倡助則彭楊二生雖

立願各同學卽襄贊未必成今

幸工竣特誌其緣起行見是書

出而信奉者亦繼美長洲斯化



民成俗誠有助焉因將諸君子  
樂輸數目及支銷細數並列同  
學校對縷附於簡不泯其勞云  
光緒六年庚辰孟秋金川鄧九  
搏仲卿氏敬識





節錄元宰必讀書二則

彭凝祉先生師說末云予教徒與教子無異必勉人熟讀經史以厚其根柢否則似無楫而濟江河也一切浮濫時文纖巧詩賦概不許入眼嘗親寫感應陰騭覺世勸孝敬字遏慾放生等文案頭各置一本題其籤曰元宰必讀書每晨令讀一遍及朱子小學彙纂功過格二書不厭詳說以長其良心而天之報我者如是其篤焉孰謂爲師不可造大福哉



又凝祉先生室慾篇末云彙纂功過格一書實  
與經史相表裏吾至老讀之不厭而簡便易行  
尤莫要於日誦感應陰騭覺世諸文使其念念  
不忘常若天地鬼神昭布森列安有觸目警心  
復墮火坑之患無如父師不以是教其子弟日  
汨沒於時文而卑陋已甚此吾所太息而不可  
解也沈端恪公跋其書云日誦一遍真人品真  
學問卽於蒙養基之省數篇帖括之咿唔得異  
日無涯之受用爲父師者何憚而不爲哉



蘭室吟館校對及門以齒爲序

繩孫劉祖武

庭三劉達尊

德卿鄭維馨

楫臣皮濟川

藜閣劉校經

斗垣楊丙照

仙友彭天爵

錫吾鄒集禧

勉齋楊建中



子荀周人龍

煥庭彭天華

生甫楊宗岱

夢巖楊弼

湘帆吳鑑藻

壺九楊鍾華

卿雲劉應龍

男盼雲恩漢

芸香恩傳



凡例

太微仙君原格。第載大略。聽人以類旁推。傳世既久。經先賢廣爲參訂。條例詳悉。令人益易遵行。自與善堂刊本出。斟酌精當。無有踰焉。近復見徐氏家藏一本。較諸刻本更細。云得自異人手授。因參校與善堂刊本。并彙考諸集。細加研擇。肌分而縷析之。期於無一挂漏。無一複疊。而復循倣感應篇刻法。加以引證註釋。而功過格之流行。於斯集大成矣。

條例分門。有綱有目。由人倫而日用。故首以盡倫。繼以脩身。由身而及民物。故次以與人。終以愛物。此四者。綱之敘次也。又就綱之中。分列細目。燦然別白。是皆徐氏藏本所定。惟其間之訓辭。則必參考諸刻。而細微酌論處。仍得益於與善堂刊本居多云。

合觀諸本。雖極細密。而凡極惡之端。不舉列焉。如於倫



常內造謀陷害。縱慾滅倫。及漁色殺害。決水放火。劫財害命等事。此乃禽獸盜賊之行。不得謂之過矣。豈區區設格之可律哉。故諸本皆不及之。至若終身但知自利。欺侮君親。及恃強毆罵。誘人致破家。造計傾人家業。離間人骨肉。誣人閨閫。有意破人婚姻。邪術惑人。殘人禾稼。私殺牛犬。私造假銀。種種過惡。亦必極無恥。小人所爲。吾輩或可免此。茲編并不載入。

盡倫脩身與人愛物四條。此士庶通行格也。外又附以伎術行功。費錢行功二條。亦於士庶通行之中。而特爲提出。取其豁然醒目。實非另爲一格也。若閨門格。居官格。則劃然各有專主。由是內外無闕。出處皆備。無人不受範圍。無地不有規則。蓋從來諸刻。無有若斯之完善者也。

格之詞。悉用白文大字。原文間有旁註。則仍從註列。但



與白文連寫。而微粗其字畫。以見不異於白文也。其在編輯者所綴。另用兩字以間隔之。其名有六。一曰總論。二曰增註。三曰廣義。四曰發明。五曰徵事。六曰附錄。

**總論**于各條簡端。總括其序列之詞。論說其分條之意。可以一展卷而義類該舉。如目之有綱。衣之有領也。其關係一條撮要之詞。亦統於總論之下。

**增註**或白文有相似而迭見者。爲剖別其異同。有一類而分列者。爲解釋其緣故。或旁註未詳。敢推例而添詞。或私衷有惑。特闕疑以俟質。期白文之無一蒙混。而後已。舉筆之下。反覆周詳。而後出之。蓋非苟焉已也。

**廣義**欲讀者之深遠旁通。則就本文所未及。因端而推極之。慮讀者之粗淺流弊。則就本文所既及。叅詳而補救之。此卽增註中引伸之筆。增註僅以明白文。廣義則開發讀者之功不少也。



**發明**大槩采昔聖賢之語。並近時感應篇註釋。與本文互相發明。間則私意有所感觸。因取其理而闡繹敷陳。或以自儆。或以諷世。亦都在發明之中。不免疎略見譏。尚俟四方博雅君子。以其該洽之衷。精淡之識。研晰無遺。惠益實多。

**徵事**非以爲法。卽以爲戒。意在激勵斯人。不得不并及其災祥之應。或災或祥。其報甚重。蓋亦生平積累所致。非僅因其一時小節而然。特徵事於本文之下。無取旁及。專摘一事。而效卽連舉焉。讀者當善會之也。

**附錄**其言其事。不關涉於本文之要義。而有可以波及者。則附誌之以備觀省焉。



彙纂功過格目次

卷首

感應篇

陰騭文

卷一

盡倫格

父母

伯叔

兄弟

卷二



盡倫格

妻妾

子女

親友

婢僕

附僕事主

卷三

修身格

致知

存心

卷四

修身格

行誼

言語

卷五

修身格

色慾

貨財

事神

惜福



卷六

與人格

交接

卷七

與人格

救濟

勸化

卷八

愛物格

伎術行功格



費錢行功格

卷九

閨門格

卷十

居官格

事使

操持

卷十一

居官格

興革

教化



卷十二

居官格

刑獄

賦稅

卷末

感應篇頌

立命說

遇竈神記

決科要語



雙生同異錄

因果三世說

因果七辨

功過格緒言

卷末

卷末

目錄

目錄

卷十二



太上感應篇

太上曰。禍福無門。唯人自召。善惡之報。如影隨形。是以天地有司過之神。依人所犯輕重。以奪人算。算減則貧耗。多逢憂患。人皆惡之。刑禍隨之。吉慶避之。惡星災之。算盡則死。又有三台北斗神君。在人頭上。錄人罪惡。奪其紀算。又有三尸神。在人身中。每到庚申日。輒上詣天曹。言人罪過。月晦之日。竈神亦然。凡



人有過。大則奪紀。小則奪算。其過大小有數。  
百事欲求長生者。先須避之。是道則進。非道  
則退。不履邪徑。不欺闇室。積德累功。慈心於  
物。忠孝友悌。正己化人。矜孤恤寡。敬老懷幼。  
昆蟲草木。猶不可傷。宜憫人之凶。樂人之善。  
濟人之急。救人之危。見人之得。如己之得。見  
人之失。如己之失。不彰人短。不衒己長。遏惡  
揚善。推多取少。受辱不怨。受寵若驚。施恩不



求報與人不追悔。所謂善人。人皆敬之。天道祐之。福祿隨之。衆邪遠之。神靈衛之。所作必成。神仙可冀。欲求天仙者。當立一千三百善。欲求地仙者。當立三百善。苟非義而動。背理而行。以惡爲能。忍作殘害陰賊良善。暗侮君親。慢其先生。叛其所事。誑諸無識。謗諸同學。虛誣詐僞。攻訐宗親。剛強不仁。狠戾自用。是非不當。向背乖宜。虐下取功。諂上希旨。受恩



不感念怨不休。輕蔑天民。擾亂國政。賞及非  
義。刑及無辜。殺人取財。傾人取位。誅降戮服。  
貶正排賢。凌孤逼寡。棄法受賂。以直爲曲。以  
曲爲直。入輕爲重。見殺加怒。知過不改。知善  
不爲。自罪引他。壅塞方術。訕謗賢聖。侵凌道  
德。射飛逐走。發蟄驚棲。填穴覆巢。傷胎破卵。  
願人有失。毀人成功。危人自安。滅人自益。以  
惡易好。以私廢公。竊人之能。蔽人之善。形人



之醜。計人之私。耗人貨財。離人骨肉。侵人所  
愛。助人爲非。逞志作威。辱人求勝。敗人苗稼。  
破人婚姻。苟富而驕。苟免無恥。認恩推過。嫁  
禍賣惡。沽買虛譽。包貯險心。挫人所長。護己  
所短。乘威迫脅。縱暴殺傷。無故剪裁。非禮烹  
宰。散棄五穀。勞擾衆生。破人之家。取其財寶。  
決水放火。以害民居。紊亂規模。以敗人功。損  
人器物。以窮人用。見他榮貴。願他流貶。見他



富有。願他破散。見他色美。起心私之。負他貨財。願他身死。干求不遂。便生呪恨。見他失便。便說他過。見他體相不具。而笑之。見他才能可稱。而抑之。埋蠱厭人。用藥殺樹。恚怒師傅。抵觸父兄。強取強求。好侵好奪。擄掠至富。巧詐求遷。賞罰不平。逸樂過節。苛虐其下。恐嚇於他。怨天尤人。訶風罵雨。鬪合爭訟。妄逐朋黨。用妻妾語。違父母訓。得新忘故。口是心非。



貪冒於財。欺罔其上。造作惡語。讒毀平人。毀  
人稱直。罵神稱正。棄順效逆。背親向疎。指天  
地以證鄙懷。引神明而鑑狼事。施與後悔。假  
借不還。分外營求。力上施設。淫慾過度。心毒  
貌慈。穢食餒人。左道惑衆。短尺狹度。輕秤小  
升。以僞雜真。採取姦利。壓良爲賤。謾罵愚人。  
貪婪無厭。呪詛求直。嗜酒悖亂。骨肉忿爭。男  
不忠良。女不柔順。不和其室。不敬其夫。每好



矜誇常行妒忌。無行於妻子。失禮於舅姑。輕慢先靈。違逆上命。作爲無益。懷挾外心。自呪呪他。偏憎偏愛。越井越竈。跳食跳人。損子墮胎。行多隱僻。晦臘歌舞。朔旦號怒。對北涕唾。及溺。對竈吟詠。及哭。又以竈火燒香。穢柴作食。夜起裸露。八節行刑。唾流星。指虹霓。輒指三光。久視日月。春月燎獵。對北惡罵。無故殺龜打蛇。如是等罪。司命隨其輕重。奪其紀算。



算盡則死。死有餘責。乃殃及子孫。又諸橫取  
人財者。乃計其妻子家口以當之。漸至死喪。  
若不死喪。則有水火盜賊。遺亡器物。疾病口  
舌諸事。以當妄取之直。又枉殺人者。是易刀  
兵而相殺也。取非義之財者。譬如漏脯救飢。  
鴆酒止渴。非不暫飽。死亦及之。夫心起於善。  
善雖未爲。而吉神已隨之。或心起於惡。惡雖  
未爲。而凶神已隨之。其有曾行惡事。後自改



悔諸惡莫作。衆善奉行。久久必獲吉慶。所謂  
轉禍爲福也。故古人語善。視善。行善。一日有  
三善。三年天必降之福。凶人語惡。視惡。行惡。  
一日有三惡。三年天必降之禍。胡不勉而行  
之。

感應篇功過格向爲修持日課。誌誦勿忘。儼對神明。悚  
然警懼。庶幾清明。日生邪僻。日斂。古之君子。敬畏聖言。  
終日乾乾。惕若厲。夫亦猶是心也。豈徒口耳之功。謂可  
僥福也哉。是編註釋功過格。仍以感應篇并列簡端。便  
人持奉。莊嚴靜對。期于實體躬行。勿竟漫爾習讀。則不  
免於輕忽侮褻矣。豈惟無益適以滋戾。告修持者戒之。



梓潼帝君曰吾一十七世爲士大夫未嘗虐民酷吏周人之急  
濟人之乏容人之過憫人之孤一心如此聽命於天故能久  
證真位今勸世人每日侵晨持念

玉皇大天尊元穹高上帝

尊聲赴感太乙救苦天尊

九天應元雷聲普化天尊

玉虛師相元天上帝金闕化身天尊四位聖號誦太上感應篇  
一徧以消罪愆遵以修行庶持念聖號靈篇得以感應自然  
福祿無量子孫榮昌諸事吉祥仕宦卿相各宜書寫此經一



帙日夕瞻視依此修行禮念

玉帝聖號行之二年萬罪消滅行之四年百福皆集行之七年  
子孫賢明榮登科第行之十年壽命延長行之十五年萬事  
如意行之二十年子孫爲卿相行之三十年注名仙籍行之  
五十年天神恭敬名列仙班胡不勉而行之



文昌帝君陰騭文

吾一十七世爲士大夫身。未嘗虐民酷吏。救人  
之難。濟人之急。憫人之孤。容人之過。廣行陰騭。  
上格蒼穹。人能如我存心。天必錫汝以福。於是  
訓於人曰。昔于公治獄。大興駟馬之門。竇氏濟  
人。高折五枝之桂。救蟻中狀元之選。埋蛇享宰  
相之榮。欲廣福田。須平心地。行時時之方便。作  
種種之陰功。利物利人。修善修福。正直代天行



化。慈祥爲國救民。忠主孝親。敬兄信友。或奉真  
朝斗。或拜佛念經。報荅四恩。廣行三教。濟急如  
濟涸轍之魚。救危如救密羅之雀。矜孤恤寡。敬  
老憐貧。措衣食。周道路之饑寒。施棺槨。免屍骸  
之暴露。家富提携親戚。歲荒賑濟鄰朋。斗秤須  
要公平。不可輕出重入。奴僕待之寬恕。豈宜備  
責苛求。印造經文。剏修寺院。捨藥材以拯疾苦。  
施茶水以解渴煩。或買物而放生。或持齋而戒。



殺舉步常看蟲蟻。禁火莫燒山林。點夜燈以照  
人行。造河船以濟人渡。勿登山而網禽鳥。勿臨  
水而毒魚蝦。勿宰耕牛。勿棄字紙。勿謀人之財  
產。勿妬人之技能。勿淫人之女妻。勿唆人之爭  
訟。勿壞人之名利。勿破人之婚姻。勿因私讐使  
人兄弟不和。勿因小利使人父子不睦。勿倚權  
勢而辱善良。勿恃富豪而欺窮困。善人則親近  
之。助德行于身心。惡人則遠避之。杜災殃于眉



曉常須隱惡揚善。不可口是心非。剪礙道之荆  
榛。除當途之瓦石。修數百年崎嶇之路。造千萬  
人來往之橋。垂訓以格人非。捐貲以成人美。作  
事須循天理。出言要順人心。見先哲于羹牆。慎  
獨知於衾影。諸惡莫作。衆善奉行。永無惡曜加  
臨。常有吉神擁護。近報則在自己。遠報則在兒  
孫。百福駢臻。千祥雲集。豈不從陰隲中得來者  
哉。



# 彙纂功過格第一卷

## 盡倫格

**總論**

積德累功。必有其本。未有倫常不盡。而

可云行善者。孝弟二者。植於天性。教學之率。自童稚而然。極其功用。可以光四海。通神明。故父母伯叔兄弟。固盡倫之莫大者也。既長成立。則有妻妾子女。由門內而推之。則有宗親朋友。皆倫常之所係。見於聖賢之垂訓者。何一非所重焉。別其情文。同其愛敬。惇庸之道。誠不可不講求也。至於主僕之間。亦有君臣之義。士大夫所以脩身而齊家者。亦正宜留意焉耳。○倫常之間。道非可以易盡也。首視其分之所當爲。終視其德之能相感。以一己之循循恭順。而合門庭內外。無不感化。悅從共歸。於行仁而成德焉。夫然後爲盡倫之極至者。試觀於舜。其家庭之遭際。



何如。而克諧盡道。使頑嚚傲慢。悉有歡愉聚順之樂。經傳所稱允若而底豫者。蓋非淺嘗薄效之可幾矣。先儒謂致中和。則必有位育之應。一家一國。隨地可實徵之。如父父子子。夫夫婦婦。此一家之天地位也。妻子臣妾。人人各得其所。此一家之萬物育也。又曰。以一家言。以孝感而父母安。以慈化而子孫順。以弟友接而兄弟和。以敬處而夫婦正。以寬御而奴僕盡其職。及一家之事。莫不當理。皆位育也。以是而思盡倫之功。精乎微乎。

父母

盡倫之一

**總論**

孝之大綱有四。一曰立德。二

曰承家。三曰保身。四曰養志。其間遇有不齊。

才有各異。要在隨分隨力。盡所當爲。實有一段至誠之意。行乎其中。終其身至於瞑目。無毫髮之遺。



憾。具於孝也庶幾矣。○聖賢教孝之語。筆不能罄。壁間有勸孝歌。言言悚惕。卽此一歌。已足令凡爲子者。撫衷自失。歌曰。人倫孝爲大。聖賢著孝經。孝能格天地。孝能動鬼神。試看不孝子。王法加極刑。予見幾不孝。烈烈被雷霆。嗟哉不孝子。豈是無良心。試說慈母苦。逆子須細聽。懷胎十箇月。晝夜不安甯。及到臨產日。命與鬼爲鄰。汝身出世日。汝母欲死。辰兒方在懷抱。便溺無乾裙。終日不離手。筋骨盡酸疼。眠兒就乾褥。將身熨溺痕。兒若有微疾。雙親目不瞑。恨不將身替。求天與神明。聞兒一聲哭。膽落並心驚。兒若會行動。時防水火濱。養成三五歲。費盡萬般心。及兒稍長大。那記親辛勤。娶得一美婦。百般會奉承。從此視父母。看看似路人。開口毋聒絮。妻言句句聽。事事母操作。妻眠午不醒。



餐餐母粗糲。妻嫌無酒葷。母身穿破舊。妻日換鮮。  
新兒或偶遠遊。倚廬盼朝昏。時時愁不測。討信卜  
歸程。及親年漸老。當家子養親。寒煖衣不節。飢飽  
食不勻。以致有疾病。也不問晨昏。仍前尋快樂。那  
顧親呻吟。雖是求醫卜。終若沒正經。卧床畧長久。  
污穢生厭憎。說數說天命。果然赴幽冥。忙忙與兄  
弟。爭產奪金銀。棺斂俱草草。乾號只幾聲。送出荒  
郊外。棄置在埃塵。細比親情義。百中無一分。普天  
人世界。骨肉首雙親。君與昆妻友。從此配合成。極  
貴與極賤。不孝不如禽。天地鬼神怒。親朋隣里嗔。  
陽間受誅戮。陰司奪筭齡。孝不論存歿。孝不論富  
貧。依力盡本分。事事要至誠。古今真孝子。在心不  
在文。生前不能孝。我親不再生。常思親容貌。常思  
親音聲。常思親慈愛。常思親苦辛。思親親不見。惟



有淚沾襟。普勸世間子。竭力孝雙親。

**一功服勞承歡致敬盡養惟恐有闕。**

一日一功。

**徵事山**

三歲哭甚哀。既冠。事母謹嚴。察言觀色。凡所以求母歡悅者。無不至。進奉飲食。必躬必潔。非有大故。未嘗去側。登第後。年已過壯。尚未娶。或問之曰。娶非其人。必爲母病。若此。乃所謂惟恐有闕者也。贈節孝先生。○夏賜。石工也。目不知書。志行純孝。冬月侍父同寢。必夾溺器於懷。溫之。父欲溺。卽以進。父卒。哀毀逾禮。母病。侍湯藥。不離左右。衣不解帶者三年。母嘗思食荔枝。家在城外。值夜大雪。越城叩市。苦求以應。賜子以小過爲弟。毆死。賜恐傷母志。含淚不言。人以爲難。曹天生曰。觀夏賜夾溺器事。此卽扇枕溫席之心。然



其心彌曲。其情彌摯矣。夫人莫不慈愛其子。爲弟所毆。尚不能忘。乃恐傷母志。至於毆死不言。其孝若此。而得於目不知書之石工。吁。可敬哉。

○對親和氣婉容。憂憤不形。一日

**發明**

王浚川曰。或謂君子事親之道。非富貴不足以

盡之乎。曰。玉粲錦衣而愛敬未至。如親之不樂何。心敬詞婉而色愉愉。雖蔬食水飲。歡也。君子亦貴乎悅親而已。富貴者。所遇一時。非由乎我者也。孰能必得之。庶人之孝。勤四體而通神明。豈必藉軒冕哉。

**廣義**

愚謂此條。凡不得於親者。尤當佩之。袁氏世範曰。凡人之子。性行不相遠。而有後母者。獨不爲父所喜。父無正室而有寵婢者。亦然。此固父之暱于私愛。亦爲子者實有不是處。要當一意承順。則天理久而自洽。親意久而自回。母徒怨天尤人。付之無奈何也。又顏



先生有言曰。前後之間。嫡庶之際。父母或有偏向。而爲子者。亦易生嫌怨。此當委心付之。期於必得歡心。而後已。大畧銷化最急。蓋親生兒女。雖有時呵讓。有時忽畧。欠缺過則忘矣。而異生者。則猜嫌有種。氣色間自有齟齬。縱百般調娛。終不能安如無事時也。處此者。直須渣滓全融。不存一毫火性。比平常爲子者。遜志承歡。倍加謹慎。有仁心之親。自然轉而憐我。若其無仁心者。感之不能。況可觸之。亦惟自盡子道。以無陷于忤逆。斯已耳。若一意見親不是。火性堆胸。消遣不能。擺脫不下。必將有遏抑不住之時。微根不除。遂致橫決。吾恐其時責親者。輕而爲子之罪。莫可追也。

◎脩德勤學致親悅。一

一功。**徵事**。陳太守閩人。十八歲。猶運鋤田間。父爲里役。被縣令杖歸。怒罵其子。子私請於母曰。令何人敢



杖我父。父復罵曰。奴才彼能讀書耳。子聞言。遂自發憤。走村塾借書。旦夕吟哦。精思審問。一年能爲文明。歲里選衣弊衣就之。吏嗤不與卷。直詣令前。試一破稱善。是年補諸生。聯捷辛丑進士。任太守。晉憲副。具慶榮。

封。◎善則歸親。過則歸已。

**增註**

善者。已之善也。過

者。親之過也。如爲一事。

與人稱述。雖出於已。而必推爲親之意。實然。又如已之德業日進。縱令特出邁種。而必推爲親之教澤使然。武周之得天下。事事歸美文王。備載於詩書。近世士夫。咸能識此意也。惟夫過惡在親。恒未必其克任諸已。細瑕薄失。惟恐誚責之誤歸。苟其重大不堪者。更安望身甘戮辱而冒承之哉。有能是者。我知其孝道有不勝計矣。○事親只以情論。凡百事宜。總期親享其美。子受其惡。未有忍於戮辱之獨在於親而已。



無所分受者。吾嘗觀古。玃事而感嘆不置。因可見過則歸已。亦其至情之不自禁也。附誌其事爲勸焉。吉玃父官原鄉令。以事逮。廷尉當大辟。玃年十五。匍匐號泣。撾登聞鼓乞代。上以其童幼。疑人教之。敕廷尉。蔡公嚴訊之。廷尉乃盛陳獄具。厲聲曰。爾求代父死。敕已許。應便伏法。汝審能死否。知汝必爲人教誘。使然。脫有悔異。亦聽許。玃對曰。囚雖蒙弱。獨不知死可怖哉。不忍見父極刑而苟延。所以內斷胸臆。委身不測。上千萬乘。此豈細故而當受人教乎。蔡乃和顏誘之曰。主上旣許釋汝父。吾見汝神儀明秀。足稱佳士。今轉辭幸父子同濟。玃曰。凡蜚蜮螻蟻。尚惜其生。況於人乎。但父掛深劾。必正刑書。故思隕仆。冀延父命。誠無所顧死。蔡公徐命稍脫其桎梏。玃不聽曰。死囚豈脫械哉。竟不脫。廷尉以聞。詔兩宥焉。丹陽尹欲舉



盼純孝。盼曰：異哉王尹！何量盼之薄也？父辱子死，道有固然。若盼當此舉，乃是因父取名，何辱如之？固拒而止。○又唐德宗怒費道冲洩禁中事，賜以鴆酒，道冲子直言白中使，請自執器以飲父，因自飲之，立死。毒自左足洞出，復生，使回具奏，詔流費氏父子於南海。後遇赦還，帝嘉其孝，拜壽春太守。◎親病

### 小心侍奉湯藥無頃刻離膝前

一日一功。發明先輩曰：人子孝親，固無時

可懈也。其特甚者，則有四等父母待孝尤甚。曰老，曰病，曰鰥寡，曰貧乏。卽如病者，坐卧不適，遺洩叢穢，薦席可憎。子所難養，惟此時。親所賴子，亦惟此時。故雖有事出外，聞病必歸，敢居家而不留心於侍奉乎？徵

事洪祥字士高，黃梅人，德性渾成，無疾言遽色。事親孝，養備至。父友璋病癘年餘，侍奉湯餅，扶持起卧，未



嘗解帶衣被垢穢必躬治之。妻完顏氏貴家女也。友璋念兒卽孝而婦或少嗔心不安。謂祥曰。吾病將愈。汝姑去就室。留一僕侍我足矣。士高陽諾。而陰伏。父寢旁。是夜父欲起。見僕已熟睡。強自下床。力因難支。忽一人參脇得不仆。友璋驚曰。爾爲誰。士高曰。兒也。知父晝所云非實。特候於此。父持泣曰。天乎。兒孝至矣。已而父疾漸瘳。士高與妻益竭力承事。優游十餘年。及父卒。思慕不已。見父形於醺薦鏡中。人謂誠孝所感。壽九十七。終里閭。稱曰隱德先生。子六人。俱賢。曰亮者。金華武義丞。亦曲盡孝愛云。○章良駿。新昌人。早喪父。其祖病瘋。手足拳攣不舉。駿日夜撫摩。疴廢家貧。極力具饘多。含伏以哺。當春和。輒背負出游。寒得。其歡數載不輟。祖年八十餘。每對衆涕泣言其孝。有司以順孫旌之。◎一日敬事神



明祖先爲親祈福免災齋戒至誠。

**徵事**

陳少卿母病

求醫不效夜半虔

禱上天願求妙藥以愈母病少頃金盤有聲視之則藥四十九粒也奉母服之卽愈後又病少卿撰青詞召羽衣祈禱道士伏壇興曰上帝甚喜青詞中有一聯云減臣之壽以延老母之年諒帝之心必從人子之請如今許太夫人更延一紀壽矣○顧文康公少時撰一表文每夜必焚香告天以延父壽願以已壽益親一夕夢黃鶴從天飛來近視之卽所焚表也後一大元字復有硃批篆字曰賜臣減算益親出於至誠賜父恂二紀壽賜臣狀元及第未幾登第父臻上壽受封爵○澄江夏芝生客居京邸念七旬老母在家久缺奉侍康熙癸卯七月望日向文昌帝君前告許印施陰騭文萬紙祈母康健已而家信至報母前



患背疽幾危於七月十五忽愈又郭琮喪父獨母在常懷罔極之嘆三十年不茹葷飲酒朝夕虔禱母壽果得一百四歲耳目不衰飲食益健觀此則人子所求特患不誠耳誠則未有不驗者也。◎一事

**責怒順受**

**徵事**唐劉敦儒母病狂非笞掠人不安食左右皆亡去敦儒日侍疾時見笞體常流

血母乃安敦儒怡然不爲痛母喪毀瘠幾死留守韋夏卿表其行詔旌閭

**三功**

**贊成親一善**◎見親有怒有憂婉轉解釋

**十功**

**孝順十五日精進不倦**

**徵事**淮安呂升事父寢處不離父年高便溺不時升

承順益謹夜嘗四五起遭兵火負父八山賊感其孝而全之父嗜美杏鄰豪奪之升爲文求神神卽譴鄰



豪發背諭以速還孝子杏地乃已。○東京趙居先父  
年九十一歲母年九十四歲性皆嚴急居先夫妻侍  
奉勤謹孝行克諧每日焚香為父母祈禱百計娛樂  
晚景而後已。上帝見其心專意一。七子三壻皆賜殊  
科居先夫婦各證仙果。夫孝親為分內事。一何獲報  
之重乎。則以其奉嚴急之親而能精進不倦若此。固  
能人所不易能矣。上延親壽。下培世澤。身列  
仙班。吾仰之而甚慕悅。吾仰之而尤內愧也。◎守一

義方訓處變不違

徵事陶侃為都督時飲酒有定限  
常懽有餘而限已盡殷浩更勸少

進侃曰僕年少時有酒  
失慈母見約不敢過也

◎親所敬愛人加意敬愛

徵事

崔沔母失明傾家求醫藥  
硃備物溫清適時每良辰  
美景必扶持宴遊笑談陳  
說於前母怡愉融液不自



知其有所苦也。母卒。瘞形吐血茹素。終身愛兄姊。幾於母慈。甥姪甚於子。居官所得俸。悉以分惠。曰。風木既悲。無由展我孝思。計親所垂念者。惟此四五人。吾厚待之。庶幾九泉慰安也。子祐甫爲唐賢相。陳成卿曰。崔公可謂真孝子矣。生盡其歡。死養其志。後世有身居富貴。而待同胞若路人。薄母舅如閒客。閱此能無汗顏歟。○曲禮曰。見父之執。不謂之進。不敢進。不謂之退。不敢退。不問不敢對。此孝子之行也。方慤註曰。愛親者。不敢惡於人。敬親者。不敢慢於人。見父之執。於進退之節。有所不敢。則一舉足不敢忘親。可知。於對問之節。有所不敢。則一出言不敢忘親。可知。○曾子曰。父母之所愛。亦愛之。父母之所敬。亦敬之。至于犬馬。盡然。然。○**承親志完一未了善願**。照事記功外。而況於人乎。另加十功。**徵**



**事**

杭州汪靜虛奉感應篇欲刻板廣施力薄未果其

子源謹遵先志積貲刻成多方勸募印施萬部於人

一夕夢父謂曰汝不但善成我志且勸善共施我已

獲福冥中汝母亦享高壽衆人與汝俱名註善籍矣

勉

之。◎爲親補一過及還一逋欠。

**增註**

此條亦有輕重

大小之別雖止列十

功實有非十功之足盡者

**徵事**

程驤父少良始爲鄆

盜致貲百萬老而改行不復出里閭者十五年旣死

驤不知後有過其母罵曰本不良種庸有好事耶驤

泣問其語母盡以事告之驤數日不食悉散其財就

里中讀書漸通五經子史動有繩墨開成間相國彭

公特禮聘之○御史柳彥輝貸陸坦銀五十兩不立

券獨柳子仲益知之後彥輝卒仲益成遼陽數年赦

還貧甚絲積粒聚得銀五十兩拜坦墓納還金坦子



以無券辭。仲益曰。若雖不知。吾實知之。吾翁與。若翁知之。吾弗償。異日。何顏見兩翁于地下也。

### 三十功

敬守祖父遺業不致隕落

發明人家之興隆雖在于天而保而守之

得以不替實在于人。故何孝子家規有撐持門戶之規。正諺所謂做人家也。事勢不同。大小各異。而要不出于勤儉兩字。守其常分。循循整飭。無獲譴于天。無好勝于人。無苟安于已。光大顯榮之事。默以聽之。而使祖父相傳之世業。不自我而廢墜。閉戶無求。戮辱不及。詎不足稱承先無忝者哉。噫。所以致此者。誠不可不講求其道矣。

### 附錄

陸梳山先生家制曰。古之爲國者。家宰制國用。在于歲之杪。五穀皆入。然後制國用。視地小大。視年之豐耗。三年耕。必有一年之食。九年耕。必有三年之食。以三十年之通制國用。雖有凶



旱水溢。民無菜色。國旣若是。家亦宜然。故凡家之田疇。足以贍給者。當量入以爲出。然後用度有準。豐儉得中。怨讟不生。子孫可守。今以田疇所收。除租稅及種蓋糞治之外。所有若干。以十分約之。留三分爲水旱不測之備。專存米穀。逐年增置倉廩。其六分作十二月之用。閏月則分作十三。取一月合用之數。約爲三十分。日用其一。茶飯魚肉。賓客酒漿。子孫紙筆。先生束修。幹事奴僕等。皆取諸其間。可餘而不可盡。用至七分爲得中。不及五分爲太嗇。其所餘者。別置簿收管。以爲伏臘裘葛。修葺墻屋。醫藥賓客。弔喪問疾。時節饋送。又有餘。則以周給宗族之貧弱者。賢士之窮困者。佃人之飢寒者。過徃之無聊者。其田疇不多。日用不能有餘。則一味節。嗇裘葛。取諸蠶績。墻屋取諸畜養。雜種蔬菜。皆以助用。不可侵過。次日之物。若



一日侵過。無時可補。則便有廢家之漸。當謹戒之。其有田少而用廣者。但當清心儉素。經營足食之路。於接待賓客。弔喪問疾。時節饋送。會合飲食之事。一切不講。免致干求親舊。以滋過失。又曰。居家之病。有七。曰呼。曰遊。曰飲食。曰土木。曰爭訟。曰翫好。曰惰慢。有一于此。皆能破家。其次貧薄。而務周旋豐餘。而尚鄙猥事。雖不同。其終之害。或無以異。但在遲速之間耳。夫豐餘而不用者。疑若無害也。然已既豐餘。則人望以周濟。今乃愒然則失。人之情。既失人之情。則人不佑之。惟恐無其隙。苟有隙。可乘。則爭媒孽之。雖其子孫。亦懷不滿之意。一旦入手。若決隄。破防矣。前所言存留十之三者。爲豐餘之多者制也。苟所餘不能三分。則存二分亦可。又不能存二分。則存一分亦可。又不能存一分。則宜節嗇用度。以存贏餘。然後家可長。



久。不。然。一。旦。有。意。外。之。事。家。必。破。矣。前。所。言。一。切。不。講。者。非。謂。絕。其。事。也。謂。不。能。以。貨。財。爲。禮。耳。前。所。言。以。六。分。爲。十。二。月。之。用。以。一。月。合。用。之。數。約。爲。三。十。分。者。非。謂。必。於。其。日。用。盡。但。約。見。每。月。每。日。之。大。槩。其。間。用。度。自。爲。贏。縮。惟。是。不。可。先。次。侵。過。恐。難。追。悔。宜。先。餘。而。後。用。以。無。貽。鄙。吝。之。譏。世。人。皆。謂。用。度。有。何。窮。盡。蓋。是。未。嘗。立。法。所。以。豐。儉。皆。無。準。則。好。豐。者。妄。用。以。破。家。好。儉。者。多。藏。以。斂。怨。無。法。可。依。必。至。於。此。愚。今。考。古。經。國。之。制。爲。居。家。之。法。隨。貲。產。之。多。寡。制。用。度。之。豐。儉。是。取。中。可。久。之。計。也。○又。陳。氏。家。規。與。曹。月。川。先。生。輯。畧。相。同。余。最。喜。其。服。用。推。仁。作。家。三。條。爲。傳。業。保。家。之。計。有。倫。有。要。言。言。切。實。并。誌。於。此。其。服。用。曰。一。每。日。佐。膳。葵。菽。瓜。蒞。腐。羹。麵。餅。之。類。其。大。常。也。歲。入。充。給。則。年。逾。六。十。者。日。得。飲。酒。三。日。



一修旨甘。餘衆則五日一飲酒。十日一食肉。老者異饌。毋得饒口。苟歲入不足。更當思節省焉。一歲時慶節。惟端午中秋及除夕。得循俗例。特設酒肴。少者拜獻長者。因得舉家列燕。以爲歡娛。苟歲入不足。則罷廢之。一每年製衣。只尚布素。有逐年一製者。有隔年一製者。有三四年一製者。總視家長所服爲準。或冬或夏。家長製衣。必遍及舉家。均平一體。一賓至設肴大賓無踰八簋。常賓以五簋爲盛。以三簋爲率。其熟識至戚往來。一簋雅潔。亦足表誠。無多肴也。其推仁曰。一門內之人。或有疾病。無論長幼賢愚。必當爲留心療治。醫藥有費。毋靳惜焉。一每當除夕。家長得以歲計羸餘。合一家長幼酌量而賞賚之。令其私貯。以備疾病時旨甘調養之需。蓋常饌定規。恐病者之情難抑。姑聽其自便爲安也。一里黨疴癢疾痛。我子孫



當淡念之。彼不自給。况望其饋送我乎。但有一毫相贈。亦不可受。違者必受天殃。一里黨及莊佃。或有缺乏。量出穀借之。後催原穀歸還。勿收其息。一子孫苟成家有道。量力寬餘。周給宗族里黨之外。凡如脩治橋路施藥施衣。施茶之類。皆當以時爲之。一戒殺。亦以廣仁。除時祭及享燕大賓外。槩不得殺牲。其作家曰。一作家以力耕田。廣積穀爲主。務本節用。其敬志之。一有田。早輸官稅。毋煩督催。毋少拖欠。一作家不可恃偶得之財。不必盡悖理傷義。總飄忽不可爲常。甚足亂整齊畫一規模。古人必行徹法。正喜其有定式也。其淡思之。一稔歲之入。必準備凶荒。餘一餘三。古人長慮。不可失也。一或頻遇荒歉。不足於用。但當力務節省。合家口糧。不妨酌減。切不可舉債。戒之戒之。一耕種之外。紡績爲重。婦女不輪值中饋。非有生



產疾病。畢集織紵堂。各課以功。其有分外精工勤敏者。量加賞予。以昭鼓勵。無故不至者。重罰之。遇俗節。則與假一日。一園圃。種植。必取有益日用者。異果奇花。雖可易錢。不可使出我家。按其家規。共十五條。每條列數則。蓋爲子孫義聚而設。若固當另刊行世。只此三條所列。行寬仁於紀律之中。舉世之所謂做人家者。非病濫奢。卽病慳刻。均可免矣。不當家。遵而戶守之也哉。

◎家庭雍睦克順親

心。

**廣義**

一家之中。兄友弟恭。夫義婦順。子賢女婉。主

恩僕勤。愉愉歡洽。有紀有倫。臨其上者。樂可知也。是豈關境遇之適然哉。全在主家之一人。淡心妙用。化導一家。薰蒸漸漬。翕然協德。則固非倖而致者矣。抑嘗論化家之道。莫難於其妻之盡順。濂溪先生曰。家人離。必起於婦人。然則雍睦之風。必先順其妻。而



後可以望斯效也。堯之試舜則以釐降。詩之頌文。特舉刑于。惟聖人能深知其故哉。

**附錄**

史測曰。人子事

親。必正其家人。而後吾親可得而事也。傳云。宜爾室家。父母其順。後人德薄。正之最難。乃有攀姻高門。以爲榮幸。不知富貴之女。鮮有不驕奢惰慢者。彼且惟意是恣。安能令其和同協一。由此家庭之間。傷害倫理者多矣。其時爲丈夫者。決絕之而不能。調停之而不得。手足疑貳。毛裏乖離。情有必至。勢所固然。不幾進退維谷哉。讀史得焦華事。淡服其行之高。而見之卓華至孝。西秦王欲以女妻之。辭曰。凡娶妻者。欲與之共事。二親也。今以王姬之貴。下嫁蓬茅之士。誠非其匹。臣懼其闕於中饋。非所願也。秦王曰。卿之所行。古人之事。孤女不足以強卿。人子知此。孝思過半矣。

**發明**

合上敬守家業一條論之一。以觀政事。一。以觀



教化二者必兼斯乃成家齊治同道其在斯乎

五十功親一事有違倫理委曲勸諫使至悅懌

**增註**此條意必

指親之萬難化者而能化之故記功如是之重若親過甚小。而化親之機亦甚易。則當准贊成親善例。似不得附會此條。**廣義**內則曰父母有過下氣怡色柔聲以諫諫若不入起敬起孝說則復諫不諛與其得罪于鄉黨州閭甯熟諫父母怒而不悅而撻之流血不敢疾怨起敬起孝邱瓊山曰按內則此章之旨朱子引之以解論語事父母幾諫章謂二章之言相表裏解幾為微微諫謂下氣怡色柔聲以諫漸漸細密不須峻暴強加闌截也愚竊以為朱子之意固是但于幾字之訓似不甚親切若以為幾微之幾則孝子之



於親視於無形聽於無聲方其幾微萌露之初卽揆其情志意嚮之所在隨事而致其察先事而爲之防消之于未然遏之于將然則用力比於熟諫爲省矣噫孝子之于親過初形則幾諫過已形則熟諫致其親于無過之地則非徒養其志而又有以成其德二章之意非但相表裏蓋相始終焉○徐紫崖曰千古稱孝子者宜莫如舜抑知舜之至孝正以其委曲化親之心爲甚摯委曲化親之功爲甚深耳吾論舜之家庭惟以尚書明文爲據暇何如人謂其心不則德義之經大約好利而多鄙者也母何如人謂其口不道忠信之言大約負能而長舌者也以舜之至性而處此視親之違道失理豈徒私謂其非宜直有深憂切痛而不自釋者蓋其真誠篤摯雖在他人有惟恐其爲不善之心觀所以化陶漁者可見而況于家庭



也乎。吾知其切切然以善期親。夙夜之間。殆將無所不至。親所爲之事。未合於善。不敢以爲無與於已。而  
翹然也。直負爲已之罪焉。親所存之心。未依於善。不  
敢以爲無與于已。而安然也。直引爲已之慝焉。益之  
此言。可謂曲形其心矣。視無形。聽無聲。此侍側之所  
以不勝其夔夔也。痛于心。禱于天。此獨處之所以不  
禁其號泣也。夫是之謂積誠愛親。其得以蒸蒸自治  
而不至於姦惡者。無一非其淡心勸化之功。則孝思  
孝德誠不可量矣。蓋負罪引慝者。必欲化親之心。祇  
載夔夔者。曲以化親之道。未有修身爲善之人。而不  
以順親爲心。亦未有欲順其親。不能淡心委曲。使其  
親自底于悅豫。而可迫期其親之順者。莊誦功過格  
自文詞顯。而旨淡矣。○親以無故破家貽累後人。盡已心力不



自禁。設位事焉。朝夕致奠。曹天生曰。視之而不見。聽之而不聞者。鬼也。戚君之母既亡。乃詣木工之門。求肖其貌。則固有形有聲矣。是已可異。乃復償絹一端。不知從何致此。總之因其子求肖不得之悲。誠孝格天。故遂幻此異事。以神之。湯臨川云。人世之事。自非人世所可盡理之所。必無妄。知情之所。不有可于戚君母子悟之矣。

**百功**事事求順親心。不吝財物。終身不變其念。

**增註**謂如手拚

財物。未嘗有瞞親私蓄者。或內帑私財。惟親意所欲為。先意承志。無少吝惜。養志之道。當如是也。**發明**橫渠先生曰。舜之事親。有不悅者。為父禴母鬻。不近人情。若中人之性。其愛惡若無害理。必姑順之。若親之



故舊所喜。當極力招致。賓客之奉。當極力營辦。務以  
悅親爲事。不可計家之有無。然又須使之不知其勉  
強勞苦。苟使知其爲而不易。則亦不安矣。○袁氏世  
範曰。高年之人。動靜恍惚。嬰兒喜得錢財微利。喜受  
衣服飲食果實小惠。喜與兒童玩狎。○喪葬至誠盡

**心力。**

**發明**

子思曰。喪三日而殯。凡附于身者。必誠必

**信。**

勿之有悔焉耳矣。三月而葬。凡附于棺者。必

誠必信。勿之有悔焉耳矣。

**廣義**

喪葬盡心力。切須知

務有所必當究心者。特錄二條。一則衣衾棺木之宜  
預營也。一則造壙成墳之宜長慮也。有所必當戒忌  
者。亦錄二條。一則鼓樂之不可隨俗也。一則佛事之  
不必妄費也。舍其要圖而徇其末務。違昔賢之訓。卽  
足以累孝子之德。明知者宜知所裁決也。○張一棟



曰父母年老宜倣古人歲製月製之義預求絲絹爲衣衾之需富則可用紵絲厚于愛親亦不爲過蓋紵絲入地最耐久切不宜用棉布棉布入地不過一月卽朽矣齊家寶要曰棺木沙枋爲上非貴價者不能堅美然中間多有破損巧于補綴未易辨識一售其欺反不若杉木之爲愈也或取三丈四丈平木及裏溪之頭段爲佳但要色老而紅赤縷細而堅實者取其木心俟其乾燥卽可用也臨攏合時一切縫罅先用絞淨真生漆厚調生麵銀硃塗嵌其間然後推敲成就雖有小小鬆隙之處皆爲硃漆充塞無不泯合之患矣試真漆法取少許抹青竹上少頃卽乾乾而粘綴不可剔剝者真否則已侵入桐油其性懈矣硃性極收濕可以助漆之堅解漆之濕故須用之棺外凡遇縫處亦用硃漆塗之棺底須塗抹令遍棺內只



以少許抹縫餘處不可多用骸骨宜近木不宜近漆也俗用瓦灰猪血調塗又以麻布糊縫真同兒戲此數物徒滋汙穢有何功力耶又一法合縫時先以船之油灰塗其內覆綿紙二三層其固甚于松脂外面灌生桐油數次此法尤爲簡便利於貧者然總非預辦不可易得凡遇父母年老卽當竭力爲之不得與兄弟分派爭較彼此推延以致倉卒悞事陽羨何公刻家禮摘要勸民曰古者六十歲制七十時制後世人多夭札五十制之非豫凶事也而愚者顧以爲諱爲之子者亦故延緩吝惜變出不測物惡價倍貽無窮之恨于心忍乎其力不足者甯厚于此勿急雜務庶免後悔已上論喪所謂宜預營者也○許氏家則曰親終卜其宅兆而安厝之惟風不露水不侵蟻不害足矣築壙不宜磚石磚久易于頽圯而樹根得



于石穴穿刺惟用三和土熟爛而堅築之久則結成全石與天地同不朽矣其三和土卽家禮所謂灰隔用石灰三十担砂石如黃荳粗者十担本色土二十担以烏樟葉二担搗爛浸水成汁膠粘勝糯粥也其汁須好缸收貯一絲墮地則滿缸瀉出矣相傳汁灑于地其樹卽生今取其汁同石灰砂土拌勻若太濕則粘杵難築太乾則燥散不堅未下棺時先鋪燥者一二寸在底築平俟下棺定向畢鋪銘旌將三和土逐漸填于四旁緩緩用杵築之一分漸漸築起勿令震動柩中人力須齊不可停歇歇則結皮不相連矣日不能完以夜繼之如不能繼次日須鋤動面皮刷汁加築硜硜有聲錐釘不入爲妙餘俱結于頂上封築完固再以土加高四尺成墳但石灰須用大窰好灰乃青石燒成內防有不著火未過石筋亦有雜白



土及白石末須用水碗中試之乃見惟灰真正則發而堅不可不慎既成墳後四至最要分明弓口號段最宜詳記其四至界限凡以樹木爲界者總不足憑須理石塼爲上界石埋土時常省視永無侵削之虞已上論葬所謂宜長慮者也○司馬溫公論居喪禮俗之壞有曰甚者初喪作樂以娛尸及殯葬則以樂道輜車鄙野愚夫悖情違禮乃至于此張仲嘉曰將舉殯之夜正人子不忍離其親故終夜哀痛悲號世乃有演戲鬧材以哀爲樂背禮傷教莫此爲甚維風君子當苦論痛止之令全孝道又有開喪之家客至用門鼓于行禮之際奏以音樂亦大非禮大約喪家但當以哀泣爲事孔子曰臨喪不哀吾何以觀之哉凡簫鼓歌唱之聲概宜禁絕此見鼓樂隨俗之必不可也○金孝章曰今日之俗莫弊于喪事用浮屠以



彼所費不貲。了無益于死者。何如。自盡其心于附身。附棺之間乎。釋氏之教。則薦死者生西方。而道家又欲超之仙界。今二者並用。將令死者于彼乎。於此乎。又曰。經懺所以消罪業。勿爲陰譴也。夫人之爲惡。天之報之。不於其身。必于其子孫。豈經懺所能解免乎。使親賢而爲之。是誣其生前。而陷之于惡也。使親果不賢。而爲之後者。不思爲幹蠱蓋愆之計。徒以誦經修齋塞責。謂親罪已消。則必復爲惡。以繼之。是自誣而重其戮也。若曰。罪孽經懺可釋。則是桀紂亦可升天。而殺人之盜跖。終作佛子也。早上殺人。晚間修誦。不害其令名。考終也。有是理乎。則天道何爲福善禍淫。而朝廷又何必賞善罰惡耶。孝章固名儒。其言本于溫公及朱夫子。非鑿空之說也。且如其言。亦未嘗得罪于佛菩薩。以愚鄙陋寡識。然竊嘗揆之。人謂三



教並重。則佛因與儒無二也。佛之釋迦。與吾儒之孔子。同爲聖人。佛之經典。與吾儒之四子六經。同爲聖人之書。吾未見爲儒者。僅口誦經書。而遂可稱善人。矧夫倩人口誦。而欲居爲已功。益無是理。於儒旣然。佛何嘗不然也。故知經懺之不足以釋罪業明矣。爲是說者。蓋有由焉。佛教之中。儘多大聖大賢出其中。一以普度羣生爲念。見世之迷惑積惡。而有悔悟之心者。曰爾向所爲罪難追矣。今爾旣知悔悟。我當爲爾懺告於天。汝速改行以補救之。此亦誘進人心之意也。要之其人誠知悔改。則一念可通鬼神。何必藉於佛力。抑佛之肯爲人懺除者。亦以其能悔。能改。而誘進之。非謂一誦經。一齋僧。而盡人可免生平之過惡也。後之庸惡僧家。循習其說。而誤其指意。借以爲衣食餬口之資。而迷惑之流。益以甚其迷惑。以爲我



之積惡無所憂也。只須臨終多作佛事。可盡懺除。有所恃而不恐。惡人愈以衆多。豈非循其說者之大以禍世哉。愚本有尊佛之心。尊其清靜無欲。尊其慈悲度衆。而獨謂誦經懺罪之說。則不可不痛絕之也。世之明理者。慎勿爲庸僧俗道所惑焉。潘鱗長曰。余按追薦一事。惟浮屠氏有此說。而近世黃冠之流。亦有所謂煉度者。彼見浮圖得財甚易。故亦尤而效之也。在宋時猶未盛。故溫公書儀止言浮屠。而家禮亦止云不作佛事。非謂道教可用也。雖然。世俗之所以爲此者。蓋以禮教不明于天下。士庶之家。一有喪事。無所根據。因襲而爲之。以爲當然之禮耳。其間固有爲因果而作者。然亦其徒云耳。若夫市井小人。其親之存。饑寒患難。尚有所不恤。况其旣死。又安肯捐其財。起其出地獄而升天堂哉。夫亦畏世俗之譏笑而爲。



之耳。若夫所謂士大夫及仕宦之家。其心亦有知其非而不欲爲者。恐他人議已之不孝。其親又恐其議已之吝財費也。是亦不得已而用之。夫飲酒食肉處內。種種大不孝之事。恬然罔忌。而獨于追薦一節。人言是恤。惡在其爲知本哉。鱗長道望。同于孝章。其言全本邱文莊公。此見佛事妄費之甚不必也。抑世更有沿襲古意而失其原者。如題主祠土。孝子惟知哀痛。不親筆墨。故請他人爲題。凶服非所以交于神明。故請他人主祠。此古意也。然題主只須命子弟善書者爲之。祠土欲安神以安祖考。孝子致其無窮之思。特求有德有望者。能與神明孚契也。今世則不然。以祠土勞其拜興。所請之人。往往隨便而題主者。則必勉求尊貴。式臨張侈其事。至于厚費不惜。更可異者。全行俱係孝子自書。只空主字一點。特請其人足



成之。此何義乎。愚觀先哲曾論及之。謂其鄙  
愚無益。非孝子所爲。并爲拈出。附論於此。

**三百功守身謹疾保全父母遺體終身無餘憾。**  
如寡嗜

**登高臨深之類**

**發明**

傳曰。身體髮膚。受之父母。不敢

毀傷。夫毀傷之端有二。或冒于刑辱。或汨于嗜慾。皆  
足以虧親憂。貽親憂。雖然。刑辱之患。雖愚者亦知保  
而慎焉。若嗜慾之禍。雖智者不免耽而溺焉。故就其  
精細而言。則尤以制慾爲重。未有能制慾者。而虞其  
或及于刑辱也。○高堂隆曰。夫五情六性。同在于人。  
嗜慾廉貞。各居其一。及其動也。交爭于心。欲強質弱。  
則縱濫不禁。精誠不制。則放溢無極。劉書曰。耳目之  
于聲色。鼻口之于芳味。肌體之于安適。其情一也。然  
亦以之死。亦以之生。或爲賢知。或爲庸愚。由于處之



異也。聲色芳味，所以悅人也。悅之過理，還以害生。故明者約欲以守貞，食足以充虛，接氣，衣足以蓋形，禦寒，處于至足之泉，立于無害之岨。王陽明曰：今之調養者，多是厚食濃味，劇酣諠浪，或竟日偃卧，如此是撓氣昏神，長惰而召疾也。豈攝養精神之謂哉？務須絕飲酒，薄滋味，則氣自清，寡思慮，屏嗜慾，則精自明，定心志，少眠睡，則神自澄。君子未有不如此而謂之致力于學者。昔人論攝養之方，如是其嚴密，乃天下之爲人子者，輒以縱恣罔忌，至于戕生隕命。◎居喪萬事瓦裂，身不足惜，獨不少念及于父母耶。

### 盡哀循禮終喪無間

**徵事**

卽傑年十四，遭母喪，食惟生菜，以熟菜有味，不入口也。歲

餘，夢母曰：死止是分別耳，何事乃爾？茶苦，汝噉生菜，遇蝦蟇毒靈牀，前有藥三丸，可取服之。傑驚起，果得



甌甌中有藥服之下蚪蚪子數升邱氏世保此甌○  
邱鐸葬母鳴鳳山之原哭曰鐸生也咫尺不離吾母  
膝下今逝矣可委體魄于無人之墟乎乃結廬墓側  
朝夕上食如生時當寒夜月黑悲風蕭颼鐸恐母岑  
寂也輒巡墓號曰鐸在斯鐸在斯其地多虎聞鐸哭  
聲卽避去會稽人異之稱爲真孝子云○支漸資陽  
人事親至孝年七十持母喪哀毀瘠甚負土成墳廬  
于墓側三時號泣有白兔白狸馴擾其旁白雀白鳥  
日集墓木廻翔悲鳴若助哀者鄉人句文鼎自娶婦  
後與父離居覩漸孝行深自悔責號慟而歸孝養盡  
志鄉間觀感化者甚衆○劉和字元中與羅洪先同  
鄉年十三時聞父理豫溺死池州痛哭嘔血以母周  
氏解譬得不死自後往來其處輒悲痛不食設酒肴  
江潯號而招焉同舟之人皆爲墮淚每食甘美必懷



歸進母後客九江聞母喪棄貲而奔廬墓玉華山左  
朝久哭朔望令節有奠物不給則織屨易之遇忌日  
齋必三日而祭明年夏風雹伐屋獨其廬不壞山多  
虎虎夜遶廬不相驚士人重之多往慰問子曰廷翰  
孫曰天曙天曙生五六月值和喪能茹素助哀與之  
肉食輒哭不食雖百試不改洪先公歎之曰嗚呼將  
氣類之感耶亦  
天有以厚之也。

**千功種一切德格天顯親。**

**徵事**積善格天人所共喻古  
今徵驗無煩廣引卽如上海

潘氏之先傭工爲業六世單傳至恭定公父爲人忠  
厚存心謙和接物中年行善愈力扶貧救急戒殺放  
生無一不至爲縣吏每遇冤獄必曲爲昭白本官未  
允甚至涕泣哀求賴以寬宥者無算一夕官夢大星



落于吏舍中。遍召諸吏告之。是夕公適舉子。卽恭定公也。官至一品。累封三代。其後科名不絕。子孫蕃衍。爲上海望族。吁。世謂顯大門閥。必讀書士子。乃能致之。豈知力爲求而失之意中。無所慕而得諸意外。其所由致此者。蓋有在也。諺有云。精于科舉之業。不必其爲能取科舉之人。而凡不得爲士子。及爲士而才學未充。儘有可以自至于光大之地。則惟視其種德之何如。但以潘公爲法。未嘗讀書求中。而祖若父。得受一品之封。不亦榮親之至乎。又商文毅父。爲嚴州府吏。平生周人之急。濟人之危。容人之過。憫人之孤。積善好施。人多稱其隱德。公謙讓不居。嘗勸同寮奉公守法。不可舞文害人。諸縣囚解府者。委曲申救。多所全活。生文毅公時。太守望見其室有光。大異之。後舉三元。入內閣。二公若出一轍。益信種德。未有不格。



天顯親者也。惟純孝者勉之而已。○福建林承美幼孤。母撫之成立。後每對客。感觸思親。輒泣。有一禪師。素著高行。承美謁之。言及親恩。無從報答。忽慟哭失聲。禪師曰。孝子思親。痛哭無益。惟篤行陰德。纔可報親。諸惡莫作。衆善奉行。作善親有益。作惡親有憂。承美敬守其言。因嘗舉以勸人。噫。禪師不習世俗資冥福之說。而侃然陳此切實之論。不可與孔曾之教互相証合者哉。○真西山曰。父母之于子。全而生之者也。所爲全者。豈謂四肢百體之備而已。有是形。則有是性。舉天下之善。無不具焉。一善不存。則爲虧其性。虧其性。卽爲辱其親矣。尚焉得爲孝乎。按此。則知修德固事親之大端。不必希求福報。而盡所當爲。孝子之自責者。不容已也。



千過積一切惡壞祖父德澤。

**發明**積惡必有才者能之。

留餘堂功過格拈案曰楊

士奇四朝元老其子楊稷怙勢行惡士奇不知也後稷惡日甚致干上聽伏法而死士奇亦幾不免嗟乎楊公聰明慎密人也稷之積惡滿盈至于殺身而楊公猶不悟則其彌縫之工蒙蔽之巧能使聰明慎密之父墮其彀中如醉如夢是稷之才亦定有太過人者矣凡權要家子弟不幸而不才徵歌買妓縱酒呼盧其禍止於敗家尤不幸而有才其禮數足以結納官府豪華足以延致賓客聚歛足以增置田產而專于收養奸猾以爲爪牙攫取小民以恣魚肉其父兄且倚之爲家幹同輩且羨之曰能人一旦禍至則殺其身而危其父故不才之禍小而才之禍大也論不孝之條者自當以楊稷輩爲首○令狐愚爲白衣時



常有高志。衆謂必興。令狐氏父邵獨以爲愚。性倜儻。不修德而願大。必滅我宗。愚甚不平。及愚仕進有名。謂邵曰。先時聞大人謂愚爲不繼。今竟何如。邵熟視而不荅。私謂妻子曰。公治性度如故。不知我當坐之否耶。必逮汝曹矣。邵沒十餘年。而愚果滅族。諸葛恪少有盛名。孫權深器重之。而恪父瑾常以爲戚。曰。非保家之子也。後果遇害。顏延之子竣貴重。凡所資供。一無所受。布衣茅屋。蕭然如故。常語竣曰。吾生平不喜見要人。今不幸見汝。竣起宅。延之謂曰。善爲之。無令後人笑汝拙也。延之嘗早詣竣。見賓客盈門。竣尚未起。延之怒曰。汝出糞土之中。升雲霞之上。遽驕傲如此。其能久乎。後果敗。謝瞻弟晦。權遇甚重。賓客輻輳。瞻驚駭。謂晦曰。汝名位未多。而人歸趨乃爾。吾家素以恬退爲業。不願干預時事。交遊不過親朋。而汝



遂勢傾朝野。此豈門戶之福耶。乃以籬隔門庭。曰。吾不忍見此。後晦果見殺。洵乎子弟無德而有才。固家門之大不幸也。先輩云。出一個喪元氣進士。不如出一個積陰德平民。此言良然。

三百過 父歿後逼嫁庶母

若自願嫁人者聽。徵事孔鏞之父友諒以雙流知縣召為

給舍。卒于京。貧不能歸。母以生子妾。賣與廣東商人。母尋卒。鏞扶二柩。備極艱辛。稍長。登進士。請于朝。得奉差廣東。尋其庶母已死。弟年十九。攜以歸。友愛特至。鏞官至侍郎。蓋庶母有母之稱。即令無出。亦父之側室也。刻薄寡恩之人。惟其忘父。則亦何所不至哉。試觀孔君之事。賢不肖之相去何如。◎蕩費

祖父產業

徵事

茂州黎瓊棄父。貪淫酒色。三年淹母殯者三載。被雷焚之。此文昌帝君寶訓所



也。載

百過爭競一財物。

**徵事**

嘗汝道齊河人。母嘗寢疾。侍養

竭誠。母憐愛之。屏人授以金珠曰。汝

素孝。可善藏之。汝道泣謝曰。汝道方愧不能盡子職。報父母于萬一。敢受此乎。悉讓與弟。陳成卿先生曰。噫。世人挾長欺幼。百計以攘親財。有母私受之。而固却不受。悉讓與弟。如汝道者哉。孝友真弗可及矣。

◎久淹親柩。

**徵事**

羅鞏游太學。以前程禱于神。夜夢神告曰。子父母久不葬。已得罪于冥。死

在旦夕。安問功名。鞏曰。某尚有兄。何獨受罪。神曰。子為儒者。明知禮義。子兄碌碌。不足責也。是年果卒。按此則不葬親之罪。固不孝之大者也。且律令昭彰。謂有喪之家。必須依禮定限安葬。若惑于風水。及托故



停柩在家。經年不葬者。杖八十。其嚴督人以葬親也。如是。然有貧不能葬者。奈何。愚爲之設法。首在初喪時。除衣棺外。百費皆省。但務盡哀。自後每日造飯。必撮米投瓶。不沾一肉味。不置一完衣。加意節省。悉以貯瓶。至五六年後。可以舉此大事矣。倘猶不足。則遍告親友。一金二金。必有好善者樂助。完成是舉。則此心方可稍安。故孟子曰。養生不足以當大事。惟送死乃可以當大事。蓋謂居喪時盡哀之苦。與葬親之難也。然可以其難而置之度外乎。嗟嗟貧者犯之。固難辭罪矣。乃或有富貴人子。以兄弟衆多。互相推諉。久淹親柩。以情而論。不知當何如加倍也。○朱在菴曰。今人葬親。多惑于風水之說。有貪求吉地。遷延日久者。有旣葬多疑。屢行啓掘者。不思古人卜地之義。惟是孝子慈孫。重親遺體。止求不爲風水所侵。不爲蟲



蟻所蝕。不爲耕犁所及。他日不爲道路。不爲城郭溝池。如是足矣。豈以親之骸骨爲子孫福利之具哉。則風水不必貪也。又有惑於分房之說。兄弟終年牽制。旣擇年月日時。又疑山水偏向。則是父母多生一子。反增一。日之暴露矣。豈知人之禍福。各有因緣。于山水何與。則分房不必執也。倘若執迷不悟。一遇名利。牽逐淹滯他鄉。年復一年。幾無安土之望。或遭水火。又有焚溺之虞。爲人子者。獨能帖然于心乎。又權厝一事。萬不可久。久則雨水侵淋。日氣下蒸。未及下土。木已腐矣。仁人孝子。亦當念之。總之葬親之志。惟在手。誠庾子輿者。吉水人。父歿于蜀。子輿扶柩歸。路徑灕潁。時秋水方壯。子輿仰天大哭。水忽退減二三十餘丈。安流南下。及渡。水壯如舊。誠之所格如此。矢余旣誠。何患事之不舉乎。○司馬溫公曰。古者天子七月



而葬。大夫三月。士踰月。今世著令。自王公以下。皆三月而葬。乃世俗信葬師之說。旣擇年月日時。又擇山水形勢。以爲子孫貧富貴賤。賢愚壽夭。盡繫於此。而其爲術。又多不同。爭論紛紜。無時可決。至有終身不葬。或累世不葬。或子孫衰替。忘失處所。遂棄捐不葬者。嗚呼。可不令人深嘆愍哉。人之所貴於身後有子孫者。爲能藏其形骸也。其所爲乃如是。曷若無子孫死於道路。猶有仁者見而埋之耶。禮未葬不變服。食粥居倚廬。哀親之。未有所歸也。今之人背禮違法。未葬而除喪。從官四方。食稻衣錦。飲酒作樂。其心安乎。人之貴賤貧富壽夭。繫於天。賢愚繫於人。固無關預於葬也。就使皆如葬師之言。爲人子者。方當哀窮之際。何忍不顧其親之暴露。乃欲自營福利耶。悖禮傷義。莫甚於此。然孝子之心。慮患深遠。恐淺則爲人所



攝。淡則濕潤速朽。故必求土厚水淡之地而葬之。所以不可不擇也。或謂家貧鄉遠不能歸葬。則如之何。溫公曰。子游問喪具。夫子曰。稱家之有無。子游曰。有無惡乎齊。夫子曰。有則毋過禮。苟無矣。斂手足形還葬。懸棺而窆。人豈有非之哉。昔廉范千里負喪。郭平自賣營墓。豈待豐嗇。然後葬其親哉。世又有游宦歿於遠方。子孫火焚其柩。收燼歸葬者。夫孝子愛親之肌膚。故斂而藏之。殘毀他人之屍。在律猶嚴。而子孫乃悖謬如此。其浸染蓋有由。行之既久。習以爲常。見者恬然。終莫之怪。誠可哀也。延陵季子適齊。其子死。葬於贏博之間。孔子以爲合禮。然則不能歸葬。葬于其地可也。豈不猶愈于焚之者哉。又曰。昔者吾諸祖之葬也。家甚貧。不能具棺槨。自太尉公而下。始有棺槨。金銀珠玉之物。未嘗以錙銖置壙中。將葬太尉公。



族人皆曰。葬者。家之大事。奈何不信陰陽。此必不可。吾兄伯康無如之何。乃曰。安得良葬師而詢之。族人曰。近村有張生者。良師也。兄乃召張生。許錢一萬。張生聞之大喜。兄曰。爾能用吾言。俾爾葬。不用吾言。將求他師。張生曰。唯命是聽。兄自以已意取歲月日時。及壙之深淺廣狹。道路所從出。皆取便于事者。使張生以葬。書緣飾之曰。大吉。于是族人皆悅。今吾兄年七十九。以列卿致仕。吾年六十六。恭備侍從。宗族之從仕者二十三人。視他人。謹用葬書。未必勝吾家也。前年吾妻死。棺成而斂。裝辦而行。壙成而葬。未嘗以一言詢問陰陽。迄今亦無他故。今著此論。俾後之子孫。葬必以時。欲知葬具之不必厚。視吾祖葬書之不足信。視吾家**附錄**大興劉公機父卒于仕。公時爲學官弟子。徒步往護喪歸。遂卜葬。族人泥陰陽言。各以



生年與葬時相值久不克公獨曰願以某生年所值月葬父于是力葬之後公官至大司馬贈官保○何子平遭母喪毀頓輒絕世亂八年不得葬常如袒括之日冬不衣絮夏不就清涼日食僅數合米不進鹽菜所居屋敗不蔽風日兄子欲葺理不許泣曰吾情痛未申天地間一罪人耳屋何宜覆會稽太守蔡興宗聞而矜賞爲營塚壙葬焉○李玘宗城人力耕事母母卒讓田與弟廬葬所晝夜號泣負土築墳又族父母有藁葬者耕獲之餘輒爲築之凡三年成六墳不食肉衣帛不預一事天禧中知府張知白以狀聞詔賜粟帛里有母在而析產者聞玘被旌兄弟俱慚復同居○熊衮事親至孝父喪不能葬晝夜號泣忽空中落錢數萬衮得錢畢其喪事所剩者告入于官庫爲御史後人稱曰忠孝兩錢御史大夫◎喪



葬不盡心力。

**增註**

此條分二等。獨子則草率從事。眾

子則裝呆規避。或公派均出。皆爲不盡

心力。蓋父母面上。惟自盡已力。竭蹶以赴。猶有餘憾。畧一惜財。則此念知有財而不知有親矣。宜功過格以百過警之。○沈龍江曰。人子一生大事。亦止此送終一事。于此而心有。不盡。則無復可盡之心矣。奈何以兄弟眾多。彼此相諉。使日久暴露。或草草完事。致有日後之悔。竊以爲爲長子者。力能獨辦。便當以爲已任。不必更求衆子。衆子之中。力或可辦。亦當以爲已任。不必偏累長子。各人行孝。各人盡心。爭先致力。纔是人子。若有心靠人一分。便是自己心上有一分。不能盡處。豈不聞古之孝子。遇親之難。爭先赴死。以求相代者乎。彼且於生命可捨。何區區財物之足云也。

**徵事**

郭原平父亡。慟絕者數念。以爲奉終當自盡。



不欲假手于人。乃助人營葬。久之練于營築之事。自營塚葬焉。又傭力以供他費。時以營家稱善工。延致者盈門。母資養焉。蔡太守表薦于朝。生三子。並有行。○王彭親喪營葬。晝則傭力。夜則號泣。鄉里憐之。各爲助工。工作須水。天旱穿井不得泉。墓去淮五里。荷擔遠汲。困而不周。彭號天自訴。忽大霧霧散。泉湧。衆嘆神異。宋文帝改其里爲通靈里。○錢塘徐公旭齡號敬菴。父某旅寓于石齋黃先生。鼎革時爲兵所害。黃藁葬之。旣道路少通。敬菴不避險阻。徒跣尋問。將至其處。夢父語曰。汝欲得我骸。須問茅十七。覺而訪之。果有其人。引至墓所。見枯骨纍纍。敬菴因號呼。滴血方得父骸。負之以歸。過嶺登舟。遭風覆溺。親入水中撈救。始得歸里安葬。敬菴順治辛卯登鄉薦。乙未捷南宮。不盡心力者盍觀此。

◎忘莫大



仇怨不思報

**增註**

所謂仇怨。謂公道所不平。修好所

難解者。情切於中。雖力不能報。而哀痛

感激。此心難已。誰無至性。豈其漠然罔念也。若小嫌

薄讐。揆諸情理而可忘。則忘之可耳。又不得概執必

報之說。

**徵事**

寧波府治南有董孝子廟。孝子諱黥。字

叔達。江都相六世孫。少孤。獨與母俱。百順咸聚。鄰人

王寄者。富而無行。母與王母相見。各言其子。而寄病

之。毆董母。孝子歸而母方蒙被卧。孝子跪請罪。母曰

無他也。我失言致寄辱也。因不起。孝子哀毀畢葬。終

不言報讐。俟王母卒。且葬。手刃寄以祭。而自詣官請

死。事聞。和帝釋勿誅。加旌焉。又辟爲郎中。孝子不就。

宋祥符間。勅賜立廟。明洪武初。加封爲神。命有司歲

致祭。用特牲。○王孝子諱世名。武義人也。年十七時

父良爲族姪俊以爭屋毆死。孝子恐殘父屍。不忍就



理。乃佯聽其輸田議和。凡田所入。輒易價封識。後有所餽。亦佯受之。雖錙銖罔有不計。值封識者。私繪父像。自像帶劍侍。至密室。朝夕泣拜。購一刀。銘之報讐字母。妻不知也。服闋。游邑庠。不專事舉子業。惟手書忠孝格言一編。佩之。已而已。子甫數月。撫之謂母妻曰。吾已有後。可以死矣。母妻亦不知所謂也。一日俊飲于其鄰。醉歸。孝子直前刺殺之。以報讐。故號于衆。歸白其母。遂出其向所封識。租價餽值。及宿搆首狀。赴邑請死。實萬曆九年正月也。去父死之日。六年于茲矣。邑陳令驗所封識。訪之士民。知報父讐。是實乃曰。此孝子也。不可令對獄。卒別館之上。其事當道。當道委金華汪令訊之。孝子曰。復何言。吾事畢矣。只欠一死。汪曰。檢若父屍有傷。子未應得死。孝子曰。吾忍痛六年。始發者爲何。不忍殘父屍也。以吾命抵讐命。



奚檢爲遂具呈懇乞放歸故里拜父辭母撫子囑妻  
絕吭柩前獻屍臺下汪憐之移文爲請當道可其議  
孝子遂得歸歸之日汪令謂曰子行吾且來子無卽  
死吾終不惜爾父旣朽之骨而不以全爾孝子仍以  
死自誓誓不欲檢汪喟然曰浮生有涯令名無已孝  
子正色曰豈謂名哉理固當如是其母迎而泣孝子  
曰身固父之遺也以父之遺爲父死雖離母得從父  
矣復何憾見陳令陳仍館之前館囑守者曰無令孝  
子死迨汪至武義邑人迎而直孝子者千人汪使舁  
其父棺至孝子聞之大慟遂以頭觸地守者持之不  
得死明日邑諸生翼而見汪孝子望見父棺卽以頭  
觸堦石血噴如雨地爲之赤諸生相持大號陳汪二  
令亦不忍視爲之泣數行下諸生請從孝子志乃舁  
其父棺去少頃孝子甦陳令又欲白於上免檢其父



以全孝子。孝子曰：此非法也。非法無君，何以生？爲遂不食而死。迎屍之日，雲霧昏慘，至歸始開霽焉。遠近奔哭者載道。○王哀父儀以直言忤司馬昭，見殺。哀痛父非命，隱居教授。三徵七辟皆不就。終身未嘗西向，示不臣晉也。廬于墓側，攀柏悲號，涕淚著樹，樹爲之枯。此雖未嘗報，而痛父之情則無日而忘也。其斯爲孝子之用心歟。

◎無一德才可見不思自厲甘作庸愚

明發

惡其無顯親報親之志，所謂情輕罪重者也。前輩有曰：凡人子事親，自少至老，卽一舉念不可忘父母。其出一言必思當理，毋妄言取辱，以辱親，行一事必思正經，毋亂行致禍，以禍親，讀書明理，冀以榮親，人倫日用之間，隨事斟酌，溫恭敏慎，成一人品，用以顯親，毋縱慾，毋偷安，毋浪費，以善事其親，作一切陰功善



事。上資其親。彼不自厲者。徒以費親之心。毫無益。親之實在天地間。不得爲人。在家庭內。何得爲子。○

### 中年無嗣。不思積德求子。

**發明**

無嗣非必積惡使然。

亦有數不可強者。若能受

持是格。誠意祈求。善端充積。必有明徵。袁了凡立命說。非欺人也。耶。摘古今事驗數條。以見不特子可求。卽賢子貴子。及子孫衆多。無不可求。若僅燒香祈禱。甚爲無益。更或多置婢妾。適增罪愆耳。**徵事** 寶禹鈞

三十無子。夢祖父謂曰。女命無子。壽且促。當早行善事。禹鈞唯諾。先有家僮盜用房錢二百千。慮事覺。有女年十三。自寫券繫女臂云。永賣此女。償所負錢。自是遠遁。禹鈞見而憐之。卽焚其券。以女囑妻曰。善撫養之。旣笄。以二百千擇良配。得所歸。後僕知之。感泣請罪。禹鈞置之不問。由是父子圖禹鈞像晨昏祝壽。



一日於延慶寺得遺銀二百兩金三十兩持歸明晨詣寺候失物者須臾一人泣至問之曰父犯大辟徧懇貸得金銀將贖父罪昨暮因酒失去禹鈞驗實還之復有所贈凡宗戚有喪不能舉出錢葬之遺孤貧不能嫁出錢嫁之故舊相知每遇窘困多寡週之四方賢士賴禹鈞舉火者不可勝數每量歲之所入除伏臘供給外餘皆濟人之急自奉唯尚儉素宅南建書院數十間聚書數千卷禮文行之儒延致師席有志於學而無供須者咸爲留之登貴顯者前後接踵後復夢祖父告曰子功德浩大名登天曹延算三紀賜五子各顯榮終當列名上真禹鈞爲左諫議大夫致仕年八十二沐浴別親友談笑而卒子儀禮部尚書儼禮部侍郎翰林學士侃左補闕偁左諫議大夫叅知政事僖起居郎八孫皆貴范文正公書其事於



策以示子孫。○閩中郡守陳翁立心愷悌。居官正直。五旬無子。內性頗妬。或勸納寵。曰。福薄。故無子。若內不能容。而徒苦人女。福將愈薄。非爲立嗣計也。郡有鄉紳。性好色。比鄰三考吏。遺女少艾。紳遣媒說合。伊母以紳年高不許。紳竟挽媒擲聘。而訟之府。守得其實。審時密令禮房備花紅及銀二封。并樂工轎夫伺候。訪新進某生邀至。自下堂禮接云。賢契少年高才。知家貧未娶。適某女亦是薄宦之後。貌頗端靜。爲勢所逼。不佞雖有公斷。然非爲士人室。恐訟猶未息。因是特爲作伐。十金代聘儀。四金將賀敬。今夕甚吉。可卽成婚。因撤堂上燈火送歸。母女其感泣。紳雖甚憾之。然吏治甚善。莫可中傷。仍以卓異擢去。斷訟之夕。夫人夢神抱二孩至。云上帝以爾夫不徇時望。曲諧佳偶。特賜兩子。夫人驚寤。直告郡守。商置側室。郡守



喜出望外。適有故鄉同年陞任。便道來訪。公留之飲。談及娶妾事。同年大喜曰。芝不擇地。弟有義男孫女。容頗端雅。願奉侍箕箒。以應異夢。守方辭讓不遑。夫人卽遣女奴出謝。定約次日致幣娶歸。時萬歷末年春日也。妻妾雍和。歡如姊妹。至冬兩子並生。郡人繪雙桂圖以獻。○毘陵錢翁好行善事。里有喻姓者。爲勢家索逋械繫。求假于翁。翁如數給。與事解。喻挈妻女踵謝。翁妻欲致其女爲翁生子計。喻夫妻欣然。翁曰。乘人之危。不仁。本欲作善。而以欲終。不智。急還之。是夕夢神語曰。汝陰德隆重。當錫爾貴子。明年果生子名天錫。十八歲鄉會聯捷。○袁昇鄞人。五旬無子。往臨安置妾。旣得妾。察其有憂色。問故。妾曰。吾故趙太守女也。家四川。且貧。母賣妾爲歸葬計耳。昇卽送還。併傾橐以贈。及旋家。妻問以妾故。公曰。我無子命。



也。若有子。汝豈不育。必待他婦。乃育哉。妻大喜曰。君設心如此。行當有子矣。次年生韶。爲浙西使。孫洪官郡司馬。○鎮江靳翁五十無子。訓蒙金壇。其妻鬻釵飾。買鄰女爲妾。翁歸呼女出侍。且告以故。翁俯首面赤。妻意已在。而翁赧也。遂出而反扃其戶。翁踰牕出。曰。汝意固厚。但此女幼時。吾嘗提抱之。恒願其長而得所。吾老且病。不可以辱。遂謁鄰還之。次年生文僖公。十七歲發解。位至宰輔。○宜興吳願山門前有坊額。題四省。父宗族有與構隙者。夜間將紙改作一代人物四字。蓋笑其五十而無子也。公知怒甚。會郡守係同年。往訴其事。守曰。此事無証據。且使實其罪。年兄無子。彼笑自若。須急爲種子計。使鳳毛麟趾。濟濟一堂。則今日肆誚者。愧死無地。且免無後之悲。公曰。弟留心房術。不惜重貲。構奇藥。厚禮招方士。二十年



來並無効奈何。守曰：誤矣。房術不如心術。若欲種子，除非種德。方今歲祲，正天假之緣也。乃列數條如代納逋負，周給貧乏，施藥施棺，造橋掩骼等類。題曰：種子。方公欣然拜謝。次第舉行，所費不踰萬金。連舉三子。後皆登第。○邛州守宗傳初以孝廉入郡，宿寓所，聞鄰婦與子女抱泣一夜，問之，則夫罹罪，自賣以贖者。公悚然解橐爲贈。俾夫婦子母如初。時公艱于子，是年遂舉子。今子孫蕃盛，世其家。李盤曰：解橐時，不暇爲生子計，而轉生貴子。今人求神服藥，而反不得子。卽得亦未必佳也。乃知求子神前，不若求子心上。

○馬狀元涓，父名從政，買一妾，詢知其父母死，不克葬，故自鬻，遂歸妾，不責所負，且厚資焉。是夕夢羽衣人曰：天賜爾子。流慶涓涓，明年果生子，因以涓名。鄉薦廷試皆第一。李盤曰：因無子故娶妾，旣還妾反生



也。若有子。汝豈不育。必待他婦。乃育哉。妻大喜曰。君設心如此。行當有子矣。次年生韶。爲浙西使。孫洪官郡司馬。○鎮江靳翁五十無子。訓蒙金壇。其妻鬻釵飾。買鄰女爲妾。翁歸呼女出侍。且告以故。翁俯首面赤。妻意已在。而翁赧也。遂出而反扃其戶。翁踰牕出。曰。汝意固厚。但此女幼時。吾嘗提抱之。恒願其長而得所。吾老且病。不可以辱。遂謁鄰還之。次年生文僖公。十七歲發解。位至宰輔。○宜興吳願山門前有坊。額題四省。父宗族有與構隙者。夜間將紙改作一代人物四字。蓋笑其五十而無子也。公知怒甚。會郡守係同年。往訴其事。守曰。此事無証據。且使實其罪。年兄無子。彼笑自若。須急爲種子計。使鳳毛麟趾。濟濟一堂。則今日肆誚者。愧死無地。且免無後之悲。公曰。弟留心房術。不惜重貲。構奇藥。厚禮招方士。二十年



來並無効奈何。守曰：誤矣。房術不如心術。若欲種子，除非種德。方今歲祲，正天假之緣也。乃列數條，如代納逋負，周給貧乏，施藥施棺，造橋掩骼等類。題曰：種子。方公欣然拜謝。次第舉行，所費不踰萬金。連舉三子。後皆登第。○邛州守宗傳，初以孝廉入郡，宿寓所，聞鄰婦與子女抱泣一夜，問之，則夫罹罪，自賣以贖者。公悚然解橐爲贖，俾夫婦子母如初。時公艱于子，是年遂舉子。今子孫蕃盛，世其家。李盤曰：解橐時，不暇爲生子計，而轉生貴子。今人求神服藥，而反不得子，卽得亦未必佳也。乃知求子神前，不若求子心上。○馬狀元涓，父名從政，買一妾，詢知其父母死，不克葬，故自鬻。遂歸妾，不責所負，且厚資焉。是夕夢羽衣人曰：天賜爾子。流慶涓涓，明年果生子，因以涓名。鄉薦廷試皆第一。李盤曰：因無子故娶妾，旣還妾反生



子。使不還妾。未必生子也。今人無子。便思娶妾。孰知子之生。不生。不關妾之娶。不娶乎。

◎報親

# 大任在身。恣意酒色。

**發明**

薛文清曰。人素羸瘠。乃能兢兢業業。凡酒色傷生之事。皆

不敢爲。則其壽固可延永矣。如素強壯。乃恃其強壯。恣意傷生之事。則其禍可立待也。又曰。酒色之類。使人志氣昏酣。荒耗傷生敗德。莫此爲甚。俗以爲樂。余不知其果何樂也。惟心清欲寡。則氣平體胖。樂可知矣。元右相阿沙不花見武帝容色日瘁。曰。八珍之味。不知御。萬金之身。不知愛。惟麴蘖是好。妃嬪是耽。是猶以兩斧伐枯樹。未有不顛仆者。次年帝崩。壽三十。一。然則酒色二者。斷不宜恣意而不節也。夫報親之事。未了。則正宜留此身于有用。奚忍戕賊之而罔恤。以自蹈于速死耶。

**附錄**

朱文公曰。中年以後爲學。且



須愛惜精神。恐忽有大事來。無以應之。陽明方討甯藩。謂三司曰。某向在長安馬上時。目光不敢過馬首。今羽檄交馳。不交睫者七晝夜矣。而形神如舊。幸有平日之養耳。觀二先生言。則知養精神以防損耗。固學者之切務。色慾條已著其戒。而茲復以報親提示之。何其嚴悚也。○劉元城曰。安世尋常未嘗服藥。方遷謫時。年四十七。先妣必欲與俱。百端懇罷不許。安世念不幸。使老母入於炎瘴之地。已是不孝。若非義固不敢爲。父母惟其疾之憂。如何得無疾。祇有絕欲一事。遂舉意絕之。自是逮今。未嘗有一日之疾。陳瓘曰。公生平學術。以誠入。無往而非誠。凡絕欲是真絕欲。心不動故。公曰然。又曰。安世自絕欲來三十年。氣血意思。只如當時。終日接士友劇談。雖夜不寐。翼朝精神如故。



五十過揚親一短。○奉養父母。不務勤儉。以致甘旨有

闕。發明

帝王平治之理。首重勤儉二字。矧士庶之治家乎。是以務此者爲功。違此者卽記過。詳見于格

中。茲特爲事親而重其責備焉。雖僅就養生言。要之送死之責。恒多不克盡者。皆由平時不勤儉而然。孟子舉不孝之條。曰惰其四肢。此不勤者也。曰從耳目之欲。此不儉者也。曰博奕好飲酒。此不勤不儉兼之者也。孝經論庶人之孝。曰用天之道。分地之利。謹身節用。以養父母。此正示人以務勤務儉也。訓誠昭然。甯待功過格而後知其不可乎。○黃見侯嘗有四字歌。語極淺顯。勸人最爲易入。歌曰。貪吃懶做。上天最怒。耗損王朝。毫無補助。世盡是人。萬事墮墮。卽爲身謀。衣食安措。藉非祖遺。曷免凍餓。先世辛勤。竟忘思



慕。恃其蓄積。逸樂無度。豈知福分。冥冥有數。享用易盡。難保如故。祇快目前。不圖遲暮。一旦貧窮。父母莫顧。生養多闕。死後暴露。不孝之罪。莫可逃避。兼之妻子。或號或訴。仰面求人。累積逋負。貧極無恥。漸遠正路。見財思攫。見富起妬。喪盡良心。那記功過。明則詐人。暗則盜竊。苟且謀生。重爲世禍。揆厥由來。貪懶自誤。所以游民聖王。深惡立法教誡。各勤本務。苟不遵者。罰夫罰布。愛民實深。豈輕督過。治亂攸關。匪爲細故。稱曰良民。斷無怠惰。物力艱難。敢不愛護。情復兼後。身家必破。即使君子。遇窮能固已身。何惜父母受苦。苟有孝心。宜知儆悟。○陳弇山曰。富貴家平時不勤儉。迨其後也。常有不克葬親之患。兼或不能延師教子。以玷先澤。是皆關係士節。此豪奢所以斷不可也。至于貧者養親。不勤宜戒。固不待言。不儉宜戒。人



每不察。蓋旣貧矣。何從爲奢。自恕者竟謂可免此矣。而不知其不然也。按論語註。儉。節制也。以節制二字替儉字。則不儉之過。貧者正多不免。如偶得一甘旨。專以奉親。可二三餐。已與妻子分食之。便減親之食。夫茅容不敢分親饌以肅賓。况自己敢攫食乎。則口腹不可不加意節制也。衣服器用。苟且自安。畢竟少留養親之地。必求完備。復求華美。便不足于瞻親。則一切服用。不可不加意節制也。諸凡作事。隨人步趨。務爲飾觀。自不免于繁費。婚嫁交際等。且置勿論。但就孝親而言。棄產揭逋。以舉祝壽俗禮。孰若節省此費。以供平時甘旨之爲有益也。又如送死之時。盛作佛事。以炫耀耳目。廣受弔奠。以誇示交遊。孰若節省此費。以盡誠于棺斂之爲有益也。○許蔚梅曰。士農工商。無不自食其力者。貴爲卿相。勤勞職事。以享天



糲。亦爲自食其力。供養父母。非其力之所出者。不可。不肯勤儉。將必希非分之得。以奉親。母論其不可得。就使可得。而日致三牲之養。正未敢詐其孝也。孔子有云。崇養以傷行。孝之累也。修己以致祿。養之大也。夫患菽水之薄。干祿以求養者。是以祿耻親也。存誠以盡行。孝積而祿厚者。此能以義養也。養而必歸之于義。則養親者。可不務勤儉以自食其力乎。

◎親疾病醫治不盡心竭力

**增註**或惜財。或忽意。皆謂之不盡心竭力。抑雖延醫奉藥。祈天禱祝。不恤困瘁。而或防慮不周。不密戢家人料理曲當。至動父母瞋恚憂惶。是亦盡心竭力之未盡善也。雖其過有間。是亦當減折記之。**徵事**蕭廡明母病瘋。廡明晝夜祈禱。時天寒。淚下成冰。如筋。額叩出血。亦冰不潰。忽有一人以小石函投之。曰。此療



夫人病。獻明纔受之。忽不見。以奉母。函中惟有三寸絹。丹書爲日月字母。服之卽平復。○瞿嗣興字華卿。常熟人。天性純孝。母患癰癰潰。當長夏。臭穢不可近。華卿燂湯洗滌。執扇驅蚊蚋。靡晝夜。至月餘乃休。旣而又罹積氣疾。衝擊下上。百藥不治。或授以刳股可療法。祝刀於天。俟刀躍方可用。華卿頓顙流血。刀弗動。華卿情迫切。強取刀刳股肉。作羹以進。母不食。已五日。忽盡啖之。氣消如失。一日母思芰食。時芰始花。華卿求諸市。不獲。凡川有芰者。解衣入水。覆其葉。覓之。雙脰皆赤腫。華卿號呼曰。神明不相我乎。俄得三芰。水中人。以爲精誠所感云。子莊亦克盡孝道。洪武初。擢禮部員外郎。與宋太史濂同官。宋太史爲叙其父事如此。○陶明元諱煜。弱冠事元武神甚謹。母病心痛。則拍張跳躅。齧牀簣衾褥。號呌以紓苦楚。歲瀕



死者六七發醫莫能愈。明元每搥心嚼舌以代母痛。一日危甚計無所出。走禱神前曰。刳股割肝非先王禮。在法當禁。煜非不知也。今事急矣。敢犯死取一爨為湯劑。神爾有靈。疾庶其瘳。禱畢。即引刀自割。忽有二童自外跳入。叱曰。毋自損。我天醫也。明元大駭。伏地乞哀。童子取案上筆書數字於几面。擲筆。二童忽仆地。隨呼家人救之。嚙以水良久。蘇乃鄰兒也。叩之無所知焉。視其所書藥方也。明元私喜。此必神所賜。吾母其瘳矣。即如方治之。藥甫及口。而痛已失。終母身不再舉。**廣義**親疾時延醫用藥尤要緊事。嘗聞之程子曰。病卧於床。委之庸醫。比之不慈不孝。于此切不可苟徇情面。一味之誤。殺命有餘。為孝子者。其慎之。**◎在外聞親疾不速歸。****徵事**徐一鵬字季祥。鄞人也。至孝。食貧授徒海濱。一夕。



感異夢覺語主人曰。吾父殆有恙。急馳歸。夜過阿育王嶺。遇虎當道。季祥視曰。吾爲父疾。馳歸。卽剗虎口。吾何怖焉。虎反顧曳尾而去。歸家。父果病昏。季祥至。則忽蘓曰。兒適歸。將無道遇虎乎。予頃夢入公署。見緋衣人曰。爾數當終。爾子純孝。格天虎且避。不敢前。今特延爾壽一紀矣。○唐瞻居母喪時。父游瀘南。夜半蹴弟庚曰。吾夢收父書。發之得亟來二字。吾父得無有他乎。吾心動矣。汝奉母奠。吾趨瀘南。黎明起。僦舟。遇江漲。舟不敢動。瞻徬徨流涕。遇一漁艇。許以倍值。連夜行。二日半至瀘。父果病甚。見瞻大驚。詢知其故。嘆曰。天告汝也。是日疾少間。瞻具舟待父歸。居數日。疾復作卒。

◎遇倉皇危難不

急顧親。

**徵事**

趙咨少孤。有孝行。盜嘗夜刼咨。恐母驚。迎盜白曰。母老且病。幸將軍勿震驚妻子物。



一。無吝。任將軍取之。惟祈少置衣糧以給老母。盜慚謝而去。○錢鏐字可大。幼孤。元末紅巾盜起。奉其祖及母。崎嶇以避之。祖爲盜所縛。可大聞。卽冒白刃。奔訴。乞以身代盜。并繫之。可大訴不已。祖亦哀訴無子。惟此一孫耳。兩人爭相代死。情極悲慘。賊憐其義。因而釋之。時母亦被執。而可大妻張氏伏叢薄中。窺見賊已執姑。卽自出迎。謂賊曰。姑老矣。請釋姑。而縛我。賊熟視良久。卽解其姑縛。縛張氏。張氏且行且睥睨其姑。俟旣行遠。卽罵賊不肯行。遂死之。明興。子遂志登進士第。封贈有加禮焉。○陳榮母雙目失明十年。百藥罔療。忽聞舌舐可愈目疾。爲之日舐數十遍。母一朝豁然開視。又鄰火及廬。榮從外奔救。抱母號呼。須臾風返。母得無恙。又郡城水災。人民漂沒。榮與母兩地隨流。各附一木達岸。卒遇其母。郡守夜夢神告。



次午有孝子附舟郡守艤舟待至日中一木冲岸視之則陳榮也郡守驚詰曰何以孝遽動天榮曰予何知孝惟不敢忘母而已

◎先世清白困貧辱行

**增註**

謂甘為僕

隸下人及諂人

取悅罔恤品節也若先世係名門望族有此不肖子孫使旁人訕笑辱及祖宗應加倍論

三十過見親有大過不善巧勸化

**發明**

顏光衷曰要父

母兄弟從天理上行

此是好意亦不可肚腸太急着手太重太重則執而不轉矣化人者先化其心其于至親尤所重云

**增註**

謹按白文有兩層義先有不勸化一層此為漠視其親再有不善巧一層此為愛其親而不淡于學問論情則不勸化之罪大論勢則不善巧之禍淡儘有以好意而父子賊恩自詒伊戚顏先生之言不可不體



味也。

# ◎白髮在堂輕自遠出

**發明**曾子每讀喪禮泣下霑襟曰往而不可還者親

乎。子欲養而親不待。是故椎牛而祭。不如鷄豚之逮親存也。真西山曰。古之事親者。不一日違其親之側。故凡間衣燠寒。抑搔病癢。視膳奉席之事。皆躬爲之。惟其從政也。迫于王事。故陟岵鳩羽諸詩。幽憂憤嘆。甚者呼天以自勦焉。後世之士。無王事之迫。乃或浮游客寄其說曰。吾將有得而歸。爲父母榮也。吁。事親之日有涯。而外物去來。不可必也。每讀斯語。足令游子悽魂。征人感泣。而凡在家者。亦宜勉矣。**徵事**有苟仙姑者。嘉靖時人。談休咎若券。後求者衆。遂爲隱語。第勸人爲善。丁太學將謁選。問仙姑姑不應。太學強求指迷。仙姑曰。不必問我。君家堂上人齒高矣。卽臚仕可唾棄。矧貲郎叢爾。太學竟謁選。領郡幕。聞訃匿。



焉。買舟之任。不數里。怪風起。一家六口。皆溺焉。○洪  
浩熙甯中游太學。十年不歸。其父作詩寄浩曰。太學  
何蕃。且一歸。十年甘旨。誤庭闈。休辭客路三千遠。須  
念人生七十稀。腰下雖無蘓子印。篋中猶有老萊衣。  
歸時定約春前後。免使高堂賦式微。浩得詩。卽歸養。  
錢塘吳慥。洪武間。官四川。其父敬夫思之。作詩云。劍  
閣凌雲鳥道邊。路難聞。說上青天。山川萬里身如寄。  
鴻雁三秋信不傳。落葉打牕風似雨。孤燈背壁夜如  
年。老懷一掬鍾情淚。幾度沾衣獨泫然。敬夫卒。而慥  
始以丁憂還家。陳仲醇曰。嗟乎。世之宦游者多矣。啻  
命千里。親老不獲從。甚則倚廬陟屺。目窮心折。終不  
敢少露于賓客笑語。及郵筒筆楮之間。而子或浮沉  
宦轍。垂五載十載。出而裾絕。入而室虛者。豈少也哉。  
則二詩可念也。**附錄** 雲南趙廷瑞讀書不第。習青囊



出遊離家時兒重華僅七歲及重華年二十日夜歔  
噓呼號請路郵於郡大守而出作詩自誓不覩親顏  
不歸少不諳父貌恐道逢不識乃榜其背曰萬里尋  
親于是踰漢沔而西禱之武當徧訪無迹瞥見山巖  
之陰有字曰嘉靖四年十二月廿二日雲南趙廷瑞  
至此華讀之慟哭亦尾而書曰萬歷六年十二月廿  
二日雲南趙廷瑞之子重華尋父至此由南陽潁壽  
東涉淮泗南抵金陵又不遇時仰天號慟夜夢元帝  
鈎簾坐呼謂曰汝父猶未死旣醒誌夢言復慟哭從  
丹陽遇毘陵窘甚行乞忽老僧杖錫而前曰汝胸何  
物華出郵示僧僧笑曰汝父客無錫南禪寺中汝第  
往明日過南禪遇一老翁心疑是父乃泣然哭訴翁  
笑曰吾離家十七載遺兒僅七歲存亡未卜焉能到  
此華遂出路郵示翁乃相携哭拜聞者皆泣下各贈



以銀資之還家。○吳璋吳江人。少孤。年十歲。母陸氏永樂年間奉例選入宮。隨親王分封廣東韶州。璋聞慷慨流涕。棄家訪母。舟中設觀音像禮拜。求見其母。誠心懇惻。泣聲淒慘。途中患痢。晝夜百起。昏憤中猶呼娘。不置。及抵韶。而母又從改封江西矣。從陸路往饒州。奔馳沙磧。兩足俱腫。卧野寺廊。有道人自言姓焦。取藥敷之。立愈。過嶺。遇黑蛇噬足倒地。復見焦道人至。以藥塗之。疼稍稍止。宿孤村。未曉行。遇大雪。憩古廟。忽又見焦道人來撫之曰。爲母忘軀若是。真鐵漢也。出餅與啖。頓忘飢寒。至饒。訪知母在王府。啓本求見。不允。乃就府中賃一室。中書思親二大字。傍帖云。萬里尋親。歷百艱。而無悔。一朝見母。誓九死。以何辭。後得請入見。母于養贍所。母已病篤。昏不知子。璋焚香籲天。剖股作糜。以進。母乃漸甦。抱子痛哭。王聞



而賢之。召賜金帛。命扶母還。後生子洪孫山。俱官至刑部尚書。試觀孝子之求近其親。不憚艱勞困憊。與親之。卽一見而惟恐不得。彼其用情如是。益可知遠出違親者之爲大過矣。

### 二十過責怒抵觸

**增註**

一時失禮。卽讀書人往往有之。非謂諍語不讓。致犯大不孝之條也。

### 附錄

庠生張某。夙有血疾。從當湖吳判官教戒酒習。坐功能出神。久之。病愈。思酒。康熙辛亥初夏。集同道數人劇飲。生已狂醉。猶留客不休。其母從屏後語。汝飲酒當思病日。客聞引去。生憤憤起。逞醉威。觸其母仆地。天明睡醒。懵然不知。少頃則嘔血數升下矣。諸友來候。俱入定。出神。往見吳判官地下。判官搖手曰。今人逆犯天條。不得復活矣。生在床褥間。微聞此語。悔曰。吾生平養親無他過。止因大醉故至此。然負大



惡誠不如死。諸友復入定求救。判官曰。地府聞其悔辭。已寬限三日。俾得理家事。然終無活理。竟死。○

兄弟小豐不睦。傷親心。

**增註**

按兄弟條中已列二十過矣。此因不友而兼責其不

孝焉。◎力有餘者。不能加厚於兄弟姊妹。隱拂親心。**徵事**

楊太史實卿有三妹。許嫁士人。懼二親將有憂。離之苦。乃市舍旁空地。為屋三區。別割產均給之。以佐贍養。雖一飯未嘗不在側。朝夕團圓。大得親心。○趙善應丞相汝愚之父。事親至孝。嘗以寒夜遠歸。從者將扣門止之。曰。無為驚吾母也。露坐達旦。迨門啓而入。家食貧。諸弟未製衣。不先製。已製未服。不服也。一瓜果必相待。共嘗也。諸妹遠嫁者。力致之。與娛侍。親側內外諸孫。合聚月下口。采羹蔬食。恩意均洽。人無間。



言。鄉里都爲感化。既卒。少傅陳俊卿題其墓曰。篤行趙君之墓。

### 十過供養曰私一飲食

**徵事**

薛公遠自戶部主事歷兵

部尚書。居官四十年。家無長物。食不兼味。室無嫠妾。曰。吾少事親。不足。今安忍有餘。

○何子平爲楊州從事。月奉得白粲。輒買脫粟。人謂

之曰。利無幾。何爾爲。子平曰。老母在東。不得御精膳。

忍獨饗乎。因泣下沾襟。有饋殽鮮者。可致致之。不可

致。不受也。除海虞令。祿祇供養。不以及妻子。人疑其

儉。子平曰。本希祿。以養親也。豈爲已利乎。○郭原平

傭賃以養親。主人爲設食。食舍肉。以父母不肉食。不

食也。○馮璲奉父唯謹。家貧。食必備甘旨。里人王鐸

素重之。延爲塾師。每有珍味。璲輒不食。○對親一疾

鐸覺後。必先遺其父。然後饌璲。璲始食。



聲厲色。

**徵事**

張義每旦必告天謝過。一夕被攝至冥

事。乃義少時因父責怒。張目反顧其父。以不孝之罪。不通懺悔故也。

◎生一怨言。

**徵事**

明嘗

熟歸孝子鉞字汝威少喪母父繼娶太倉娘太倉娘既有子孝子由是失愛父提孝子太倉娘輒索大杖與之曰徒手傷乃力也家貧食不足贍每至飯熟時太倉娘輒譏數孝子不置父大怒逐之於是母子乃得飽食孝子累困頓匍匐道中比歸父母相與言曰有子不歸家在外作賊耳又復杖之屢瀕於死方孝子依依戶外欲入不敢俯首竊涕鄰里無不憐之。父卒太倉娘獨與其子居孝子擯不見傭身市中以糊口時私于其第處問母飲食致甘鮮焉。正德庚午大饑太倉娘不能自活孝子往涕泣迎母母內自慙。



終感孝子誠懇從之。孝子得食先母弟而已有饑色。弟尋死。太倉娘終身怡然。諸凡與孝子遊者皆曰。吾未嘗見孝子言其母若何。○**隱含一怒親念****增註**此則孝子之純誠愈可欽也。亦指責

怒時言抵觸者形諸外。含怒者藏諸中也。夫當其責時非至聖大賢能信其無怒乎。必極力禁制之。方可免過。**徵事**韓伯俞母性卞急。伯俞頻受母杖。一日因杖而泣。母曰。他日杖汝常悅受。今日獨何故悲泣。伯俞曰。往者杖常痛。知母康健。今杖不痛。知母力衰。是以泣耳。人之有至性者其異于常情若是。○**居**

**喪未禫違禮**如易服聽樂飲酒茹葷之類。一事爲十過。若大違禮度如娶妻納妾生子匿喪。

**赴試之類**一事爲百過。**發明**方遜志曰。三年之喪自中出者也。非強乎人也。因其心之不安筦簞也。故枕



塊寢苦。因其心之不甘肥厚也。故啜菽飲水。因其不忍佚樂也。故居外次。不聞樂。豈制於禮而不爲哉。情之不能止也。今之能喪者寡矣。○司馬溫公曰。古者父母之喪。旣殯。食粥。齊衰。疏食水飲。不食菜菓。父母之喪。旣虞。卒哭。疏食水飲。不食菜菓。期而小祥。食菜菓。又期而大祥。食醯醬。中月而禫。禫而飲醴酒。始飲酒者。先飲醴酒。始食肉者。先食乾肉。古人居喪。無敢公然飲酒食肉者。漢昌邑王奔昭帝之喪。居道上。不素食。霍光數其罪而廢之。晉阮籍負才放誕。居喪無禮。何曾面質籍於文帝座曰。卿敗俗之人。不可長也。因言於帝曰。公方以孝治天下。而聽阮籍以重哀飲酒食肉。宜擯四裔。無令污染華夏。隋煬帝居文獻皇后喪。每朝必進二溢米。而私令外取肉鮓。置竹筒中。以蠟閉口。衣襪裹而納之。至五代之時。居喪食肉者。



人猶以爲異事。今之士大夫居喪。食肉飲酒。無異平日。又相從宴集。覩然無愧。人亦恬不爲怪。禮俗之壞。習以爲常。悲夫。凡居父母之喪者。大祥之前。皆未可飲酒食肉。若有疾。暫須食飲。疾止。亦當復初。必若素食不能下咽。久而羸敗。恐成疾者。可以肉汁及脯醢。或肉少許。助其滋味。不可恣食珍羞盛饌。及與人宴樂。是則雖被衰麻。其實不行喪也。惟五十以上。血氣旣衰。必資酒肉扶養者。則不必然耳。其居喪聽樂。及嫁娶者。國有正法。此不復論。又曰。父母之喪。中門外擇僕陋之室。以爲丈夫喪次。斬衰寢苦枕塊。不脫經帶。不與人坐焉。婦人次於中門之內。別室。撒去帷帳。衾褥華麗之物。男子無故不入中門。婦人不得輒至。男子喪次。晉陳壽遭父喪。有疾。使婢丸藥。客往見之。鄉黨以爲貶議。坐是沉滯。坎坷終身。嫌疑之際。不可



不慎。又曰：父母之喪，不當出。若爲喪事及有故，不得已而出，則乘樸馬，布裹鞍轡。○張仲嘉曰：今多有爲嫁娶慶賀諸事，冒禁忘哀，釋服從吉者。而且公然於柬帖之中，直書從吉二字。因而華服宴飲，悖典禮。蔑王章，肆然無忌，真可痛哭流涕者矣。按曾子問：三年之喪，弔乎？孔子曰：三年之喪，練不羣立，不旅行。君子禮以飾情，三年之喪而弔哭，不亦虛乎？謂重喪雖至，練祥不與人羣立旅行，恐或言及他事，卽爲忘哀。若弔哭於人，哀在彼，則忘我親哀在親，則弔爲詐僞矣。此所以爲虛也。吁！弔尚以爲不可，況儼然更易吉服而行慶賀之事乎？如萬不得已，遇有宜慶弔者，皆當遣人具書送禮，而身不與宴會之列，可也。○蘓氏鄉儀曰：凡三年之喪，除不得已，幹治家事外，終喪不可行慶弔，請謁聚會。若卒哭後，有甚不得已事，須至見



人者可暫衣墨衰行之。事畢。反其喪服。甚不得已。如  
爲人聽訟。當入公府。或親戚間有患難。不可不親救  
卹之類。自餘請謁聚會之類。皆非所急。不行無害。或  
有未安。以書簡致意。人亦諒之。○駱于本曰。居喪決  
無易服之禮。大不得已。則墨衰。決無赴燕之理。人召  
之燕。猶爲不知禮。況於燕客乎。**徵事**嘉靖庚子秋。湖  
廣通道縣庠生鄭文獻。以母喪旬日未闋。求應試。教  
諭宋尚恩不可。乃挽父兄姻婭爲之懇請。宋拒之益  
力。文獻出怨言。宋曰。必不得已。須葬母姑。聽其去。然  
以予爲不知可也。文獻欣然出其柩。權厝城外。遂與  
族人鄭遂俱赴試。有楊登及鄧監生亦附舟。次辰州。  
訪一術者。善祿命。亦善相。謂文獻曰。子旦夕奇禍至。  
宜亟歸。謂鄭遂曰。子禍亦奇。謂楊登平平。惟鄧監生  
可有功名。三人怒曰。俟我輩得意歸。當摔而辱之。時



鄭遂亦新喪偶。未踰月。卽繼娶。娶未久。卽起行。舟宿常德堤。曉星燦然。惟黑雲如蓋覆桅上。少頃。暴雷大震。拔舟中大桅而去。人起視。見空中木削如蝶。百萬飛下。鄭文獻、鄭遂、楊登俱震死。鄧監生幸無恙。楊登隨醒。俄鄭遂亦醒。聾其左耳。半身黑。鄭文獻竟死。遍身如漆。四肢綿軟。若無骨者。楊登、鄭遂乃斂文獻屍。徑歸。鄧獨赴省得科。顏光衷曰。旬日之服。所係若無多。而此心之忘親欺君。傷本根者大矣。此等人皆不知功名自有分定。故喪心爲之。有從而解之曰。父母暗中。必自喜他赴試。此真所謂邪說暴行。無父無君也。者。◎貧賤喪親。不能盡志盡禮。旣得意。遇吉慶榮華。

惟知一己歡娛。全無憶親之念。

**徵事**

寇萊公少時。不修小節。頗愛游戲。太



夫人性嚴嘗不勝怒舉稱錘投之中足流血始折節  
從學及貴母已亡每捫瘡痕輒哭爲學士時賜賚甚  
厚乳母泣曰太夫人不幸時求一縑爲衾祿不可得  
豈知今日富貴哉公慟哭竟日盡散金帛終身不畜  
財產○朱百年家貧母以冬月亡衣無綿絮百年自  
此不衣綿帛嘗寒時就孔顓宿衣悉袂布顓覆以卧  
具百年初不知旣覺引去謂思遠曰綿定奇溫因流  
涕悲慟思遠亦爲感泣○姚伯華桐廬人年二十未  
娶事父母極孝遇元末兵亂奉二親匿閭原山中倉  
卒爲盜所迫投叢莽間散失不知所在明日盜稍退  
伯華遍野追求其親不可得哭聲徹天忽有指示云  
爾親在崖下趨視之則皆死矣伯華慟絕復甦用二  
被裹父母屍以肩擔之乘夜由間道奔桐江至姚家  
山祖墳之右揆樹葉拚之徐用木椎乞土饑寒無力



又慮他盜之窺覬也。晝伏夜作。二晝夜穴成。深可丈。負二骸殯于穴。仍負土築壘。高三尺。痛哭嘔血而出。未幾明興。民各復業。伯華歸。卽舊基而屋之。聘錢塘楊氏爲婦。生三子。家業漸饒。伯華恨二親死非其所。每一念。至悲。不自勝。計其遇難時。二月也。不知其死之日。故每臨二月。則終日絕酒食。不茹葷。不接賓客。獨擁鑪。自泣。手持杖。畫灰。隱痛裂肺。肝淚傾注。灰盡濕不已。或問之。故不答。勸之。益鴟咽弗止。進飲食輒推去。奉祭祀執爵哀哀呼。父母如在膝下。時聞者無不感動。後三子生。八孫顯者。曰夔。吏部尚書。龍河南左叅政。子孫男女不下七百指。伯華壽七十餘卒。贈通議大夫。禮部右侍郎。

五過阻親善

一言卽計五過增註

按勸化條阻人善爲

三過。而于父母則加重焉。蓋孝子立心以



聖賢期其身。卽以聖賢望其親。假親有過而無以使  
之順于理。孟子謂不可以爲子。是則惟恐親之不  
爲善也。乃親有善端而率意阻之。其于愛  
親之心何居。宜其過之視平人而加重也。○違一義

### 方訓習爲無益

**發明**

明童希賜訓其子曰。汝服膺孝

人感應之理。一飲一食。勿傷天地之和。一言一動。勿  
違天地之正。一瞬一息。勿虛天地之光陰。以示無忝  
所生。無負我教。斯爲孝矣。夫習爲無益。則虛天地之  
光陰。違義方訓。則負父母之教。一舉而犯二大罪焉。  
其關於孝行

### ○推諉一日供膳

**徵事**

龍游徐氏兄弟

二人相距數里。五日

者非淺也。

一輪養母。兄貧甚。弟較兄稍裕。兄供母饘粥。不給輪  
內尚缺二日語。母曰。食乏。且往弟家。少有來路。容當



補之母往弟門。弟不納曰：兄供未滿。母語以兄意。弟密令妻隱藏其飯云：飯已食完。且曰：兄與我一樣者。兄無我何能有。母特偏愛兄耳。兄可推出母。我何甘獨養母乎。母餓甚。哀求借碗飯充饑。堅拒不肯。母乃垂淚還行。未里許。雷電交作。雷神提飯置戶外。遂震其妻死於門。夫死於室。嗟乎。世人談及此等人。未有不怒髮衝冠者。然而身當供膳。恒不能無推諉之心。徐某所云不甘獨養母。以今之世。何在不然也。○萬載縣有丐者。姓郭。左手及兩足皆反掌于上。止得右手拄地。擦人遂名以郭擦。母老病風。弟病亦然。擦出丐養母及弟。如此者十八年。無怨。一日遇道人贈藥五丸。擦服之。手足卽如常。夫擦有弟在焉。不强之以同丐。而獨盡力以養母。且養母而并養其弟。世之衣冠者流。聞此丐之風。而有不愧汗者乎。

**附錄** 韋景駿



爲貴鄉令。有母訟其子不孝。景駿召其子諭曰。我不幸少孤。身仕而親不在。不能展我供養承歡之願。見人養親。輒自恨。終天不禁痛悼。今汝幸叨任溫清。何得如此。錫類不行。令之罪也。淚隨言下。旣而嗚咽失聲。母子感而皆泣。拜謝歸。極盡慈孝。爲鄉里稱異。○

劉洵直總角時。父母相繼亡。號慟幾絕。苦志篤學。誦書率至夜分。嘗一夕。族父聞哭聲甚哀。問故。曰。讀馬周傳。至其言少失。父母犬馬之養無所施。爲之悲感。不能自止。族父亦爲欷歔破涕。後登紹興二十一年第。

○客一財物違親心徵

顧昕幼喪父。事母至孝。以母疾不如輩者十年。每鷄鳴起。衣冠率妻子詣母室。問所欲。五十年如一日。母老喪明。昕日夜號泣呼天。母目忽明。○唐贊明先生有孝順歌節錄四首于此。一曰。謾把錢財穀米論。此



身亦是父娘身。如何毫髮能私得。你是雙親恁麼人。  
一曰。可嘆雙親手內貧。要穿要用懶求人。勸君六飯  
三茶外。還要供親數兩銀。一曰。要一分時計一分。誰  
人常有許多心。莫因親未分明說。作啞妝聾不做聲。  
一曰。謾道形容似去年。今年親已鬢毛斑。却思前面無多路。及早承歡向膝前。

三過

親年老不堪強之任勞。

一曰三過

◎貧不能養遂不顧

親。

一曰三過

徵事

朱泰武康人。家貧鬻薪養母。適數  
十里外。易甘旨以進。戒妻子常候母。顏色一日雞

初鳴入山。爲虎所攫。負之而去。泰已瞑眩。忽少醒。厲  
聲曰。虎爲暴食我。恨母無託。爾虎忽棄泰于地。走不  
顧。如人疾驅狀。泰匍匐而歸。母持以泣。泰亦強舉動。  
不踰月如故。鄉里聞其孝感。以金帛遺之。日爲虎殘。



○洪武間鈞州張宗魯四歲失明二十遭亂負母路氏逃難其妻扶掖以行歲饑賣卜以爲養日給不足妻採野菜以繼之天下既定奉母還鄉竭力供養母卒仍求其前母吳氏沈氏曹氏遺骸合葬父墓禮部以聞上曰宗魯以瞽子而能行孝如此命旌其門○楊乙武進圩橋人行乞養父母所得食雖極饑不敢嘗必先以奉親有酒則跪進跳躍起舞唱山歌以悅之如是者十年鄉人感其孝與之金僱爲傭不受曰吾親烏可一日離也父母相繼死乞得棺脫已衣斂之雖嚴寒赤身弗恤葬于野卽露宿棺傍日夜哀號歲時拜獻未嘗缺失若而人者莫有如其貧矣艱難困悴之中孳孳焉顧親之念不少釋夫誰得以不能養自諉乎○子路曰傷哉貧也生無以爲養孔子曰啜菽飲水盡其歡斯謂之孝然則人子之養親豈在



乎貧與不貧也。

◎小事欺親。

大事利已欺親。加十倍。

發明

此條卽感應篇所謂暗侮君

親也。暗侮二字最深微。此心稍有不可對君親者便

是人當時時深省不可忽也。

徵事

顧熊至孝父娶妾

生子鍾愛之。熊每歲束修悉以奉父。東家知其孝至

館日卽以一歲修金與之。曰今日之銀翁尚未知有

田欲售可買之。至秋成可得租若干。熊曰不可。豈忍

爲幾石米以欺吾父哉。卒持獻其父。生子際明。少年

登第。○武康駱乾沙宗伯宦于京。巡鹽田直指其門

人也。一日以院胥缺一名爲兩公子壽。公子以未有

父命辭。直指笑慰之曰。此聊爲兩世兄蔬果資。曾區

區者而亦聞之老師乎。公子終不受而分之。戚黨不

敢重違直指意也。噫。今之僞作父書以干澤。比比而

是如駱公子之敬凜父命。見利不欺。詎非難得哉。



◎一玩物私悅妻子不以奉親

**增註**疑此條。卽妻妾條所云順妻子廢孝

弟也。此爲三過。而彼爲十過。意者此就平居言。彼就有故言。當其兩下嫌疑。而我從中微有左袒之意。覺此爲偶失。而彼爲昧心。宜其罪重于此矣。**附錄**留餘堂功過格拈案。子路見夫子曰。昔者由也。事二親之時。常食藜藿之食。爲親負米百里之外。親歿之後。南遊于楚。從車百乘。積粟萬鍾。思欲食藜藿。爲親負米。不可得也。子曰。由也事親。可謂生事盡力。死事盡思者也。嗟乎。讀子路之言。人子有不通身汗下者耶。夫父母得子極早。亦不過二三十歲。子能自家成立。手掙錢財。身登貴顯。極早亦必待二三十歲。然則爲人父母者。等待子能養時。極好已是五六十歲人矣。譬如持短燭而行長路。奔趨投店。尚恐燭滅。况敢逍遙。



于中路哉。爲人子者。擁妻抱子。飽食安眠。漏盡鷄鳴。同衾並枕。豈知堂上髮白眼暗之老人。又復刪除一日。耶。妻子之年方少。享用之日正長。況妻可再續。子可再生。而生身父母。一去不復。上天下地。尋覓無門。危乎危哉。幸未及此。一則一喜。一則以懼。

**一過**事親祇循虛文。於凡饑飽寒煖。勞逸痛癢。不能曲

**意體悉調和。**

一日一過

**徵事**

宋任元受諱盡言。事母

至孝。母老多疾。未嘗離左右。思母得疾

之由。或以飲食。或以燥濕。或以語言稍多。或以憂喜稍過。于是朝暮候視。無毫髮不盡。五臟六腑中事。皆洞見曲折。不待切脉而後知。故用藥必效。雖名醫不逮也。時張魏公作都督。欲辟之入幙。元受力辭。且盡



言方專志事親。今使得一神丹。可以長年。必持以遺母。不以獻公也。况能舍母而與公軍事耶。魏公太息而許之。○晉劉殷七歲喪父。哀毀過禮。祖母王氏盛冬思堇而不言。食不飽者一旬矣。殷私怪之。審察不得其情。跪而問焉。王乃言其故。殷時年九歲。走至澤中。慟哭曰。殷罪釁深重。幼丁艱罰。王母在堂。旬日違養。殷竊憂痛。皇天后土。願垂憫哀。聲不絕者半日。忽若有人云。止。殷止聲。收淚視地。便有堇生焉。因得斛餘而歸。一日夢神謂曰。西籬下有粟。寤而掘之。得粟十五鍾。銘曰。七年粟以賜孝子劉殷。自是食之七載方盡。同郡張宣子以女妻之。張氏性亦婉順。事王母以孝。聞奉殷如君父焉。及王氏卒。夫婦毀瘠。幾至滅性。時柩尚在殯。而西鄰失火。風勢甚盛。夫婦叩殯號哭。火遂越燒東家。後有二白鳩巢其庭樹。自是名譽



彌顯累官至太保錄尚書事。

◎對親失敬。

**發明** 涑水家儀曰居閒無事則侍于父母舅姑

之所。容貌必恭。執事必謹。言語應對必下氣怡聲。出入起居必謹扶衛之。不敢涕吐喧呼于父母舅姑之側。父母舅姑不命之坐。不敢坐。不命之退。不敢退。

**事**

陳繼字嗣初吳縣人生十月父亡母吳氏撫教之

貫穿經學人呼為陳五經奉母至孝有司上其事上使人廉之方隨母抱甕行灌偃僂甚恭母以壺漿予之拜而後飲上大嘆異以為有

禮。即日驛召授翰林五經博士。

◎晨昏出入儀節不

**謹**

**發明** 曲禮曰凡為人子之禮冬溫而夏清。昏定而晨省。出必告。反必面。

◎出言不和

**婉**

**附錄** 子路問于孔子曰有人于此夙興夜寐耕耘樹藝手足胼胝以養其親而無孝名何也孔子曰



意者身不敬歟。詞不遜歟。色不順歟。

◎見親勞安然坐視

一事一過徵

誦書聞父耕叱牛聲。釋書而泣。師問之。荅曰。自傷年幼。不能即致榮華。使老父不免勤苦。師知其必貴也。

頻以稱于人。後果然。

◎親有疾不躬侍湯藥而使婢僕代勞。

一日

一過有萬不得已事則免。

增註

迫于事者亦須時刻

在念。寢食不甯。乃見人子至性。否則即為過矣。

徵事

李瓊娶妻有子。移居母室。夜常十餘起。母諭之曰。汝年來筋力頗憊。盍求婢以侍我。瓊曰。凡母所欲。不親經手。意如有失。○嘉靖壬戌。興化城被寇。惟一孝子得全。孝子事親。親病則不寐。無養則不寐。居喪則不寐。人號為三不寐。**廣義**。榮陽呂氏曰。孝子事親。須事。事躬親。不可委之使令也。嘗觀穀梁言天子親耕以



供粢盛。王后親蠶以供祭服。國非無良農工女也。以爲人之所盡事其祖禰。不若以已所自親者也。此說最盡事親之道。◎奉命怠惰致親怒。**發明**禮記曰。父命呼。唯而不諾。手執業則投之。

食在口則吐之。走而不趨。此奉呼喚之命也。溫公曰。凡子受父母之命。必籍記而佩之。時省而速行之。事畢則反命焉。所命有不可行者。則和色柔聲。具是非利害而白之。待父母之許。然後改之。此奉役使之命也。◎不愛親以道。曲從違義。**增註**此必指小節言。若大過。無論其不可從。不

勸化已爲三十過矣。◎違親志不肯勤學。一日一過。**增註**此指習其事而不勤者若

一日毫無所事事。則本身行誼已記一過。違親志又一過焉。**徵事**任敬臣五歲喪母。哀毀天至。七歲間父



曰。若何可以報母。父曰。揚名顯親可也。乃刻志從學。卒以成名。官宏文館學士。**附錄**樂羊子遠遊京師。一年來歸。妻跪問故。羊子曰。久行懷歸。無他也。妻乃引刀趨機曰。此織出自蠶繭。成于機杼。一絲而纍。以至于寸。累寸不已。遂成丈疋。夫子積學。當日。知其所亡。以就懿德。若中道而歸。何異斷斯機乎。羊子感其言。遂還終學。沈釋之年二十五。卽廢學。謀利。其妻石氏最賢。力諫不聽。乃苦告翁姑曰。新婦姊妹皆嫁爲士人妻。今郎君不肯讀書。令新婦歸甯。羞見親戚。願自備束脯。乞爲擇師。勉令就學。不敢望其亨達。但成一好秀才。不辱門戶。亦賢夫矣。翁姑嘉納其言。釋之。由此厲志成學。後五年登第。愚觀近日膏粱子弟。婚娶之後。遂怠荒于學業。雖有良師之訓益。父母之責望。無奈其志氣廢弛也已。如此賢閭。不少槩見。瞻歡蕩。



心耿耿之言莫由入耳。曷所奮興乎。余故附錄此以風勵之。

◎一事教導不留心。

**增註**

曰教導謂必宜從者。不留心已爲

過矣。若故不肯從。乃爲忤逆。不在此限。

◎責怒時不

**痛自內責**

**發明**

古人云。天下無不是的父母。親有責怒。必已之有不是也。不思內責。與含一怒

親念大別。謂但以親爲當責。當怒而不思。日後之何以不致親責。怒事親者充類至此。則無往而不爲孝也。

**徵事**

鵞湖費宏爲翰林時。與關中某同年對奕爭

勝。戲批其頰。某不悅。公悔。日往請罪。終不出。費封翁聞之大怒。乃封號一竹板。送至京邸。令公自扑。公持父書及竹板登其堂。自扑三次。某始出。抱頭而哭。公訝問故。某曰。公尚有父督責我者。不可得也。于是大慟。自此相好如初。噫。封翁教子。可謂嚴矣。



而不違父訓。切於自責。如費公。誠八情所難。至。◎私

竊一微物。

價值百錢以內。爲一過。致互疑同室。指神

呪罵。猶不自白。

另加五十過。

**徵事**

大業八

年。宜州城民皇甫遷。兄弟四人。惟遷不事生業。母嘗取錢置牀上。遷便偷去。母還覓錢不得。遂勘合家良賤。並云不知。母怒。悉加鞭捶。大小皆怨。未幾。遷亡。其家猪生狔子。八月社至。賣與遠村社家。遂托夢于婦。曰。我是汝夫。爲盜取婆錢。枉及合家受拷。今我作猪償債。賣與社家。將欲殺我。汝何忍不贖我。婦初夢。忽寤。仍未信之。復眠。其夢如初。因起告姑。姑曰。吾夢亦如之。遲明。令兄賁錢詣社官收贖之。後二年。方死。鄰里皆能話其事。

◎婢僕爲親所喜悅。因小失於親前。輕加詈



罵致拂親心

**徵事**

馮璪父有老婢病爲奉湯藥如事

忘之。是忘吾父也。吾豈忍哉。

◎起一怨親念

**發明**

推怨親之念所

苦于貽累。一則傷于不慈。庸下者流。不安義命。不知

自責。切切然多怨焉。不知父母猶天。天之生人。賦予

無私。而豐嗇不齊。或生而闕官殘體。蒙心塞竅。等焉

受形。而獨不全乎。爲人亦可云。天之貽累矣。而敢怨

乎。或生于乞丐之家。漁網之戶。自幼而歷艱勞。受凍

餒。抑或疾病痛楚。以困之。災祲刀兵。以厄之。等焉處

世。而獨不得以安享。亦可云。天之不慈矣。而敢怨乎。

聖賢處憂患而倍凜修持。則知孝子處不幸而益當

自勉矣。徒以嗟怨。欲何爲乎。

**徵事**

張行婆者。濰州人

父爲虎翼軍校。生七歲。繼母潛使僧鬻之。給其父云。



亡矣。父哭之失明而行。婆鬻泗州士族爲媵。故在也。後二十年。與父遇於主家之門。識之。抱而哭。遂辭主。與父歸。主故愛其恪勤。聽焉。旣歸。父欲逐繼母。行婆曰。兒非母不得入貴人家。兒歸而母逐。其安乎。父乃止。後父卒。事繼母益謹。母老不能行。負之行。後嫁爲王祐妻。事載史傳。○山陰王遂東先生作瞿孝子傳。孝子父嘗爲吏。同列以侵糧事誣坐之。論戍繫金陵。家產悉輸入官。孝子兄以憂怖死。時孝子年十六。裹糧經握。匍匐赴金陵。鳴父冤。急不可卒白。會獄寢死。者過半。孝子度父疾篤。非酒不起。顧時嚴酒禁。乃持壺走公庭。號泣願受笞。吏心憐弛禁。孝子草冤狀。徧投撫按道府諸當事。所至必哀號。嗚咽動左右。終莫能白。久之。巡方李公初按臨舟。衛戒嚴。孝子徒步冒雪逐舟行。且呼且哭。至夜力竭。嘔血仆雪中。幾死。已



而聞鷄聲復驚起追及啼呼如故至曉氣盡復仆。方親見之知有冤遣人納其揭以薑湯甦之。因廉知誣狀釋孝子。父自繫獄至得釋閱十餘年。孝子備歷艱苦殫血竭誠卒白父冤歸里無尺椽寸產始則力耕繼乃事貿易爲菽水歡未嘗一日怠也。三十後始娶家稍饒甘旨浸備事父益謹。偶有不懌必長跪請或時携幼子摩弄嬉笑以娛其前。自出獄至父沒又三十餘年。孝子亦漸老。依膝下如嬰兒。承意觀色。惟恐不至。父嘗嘆曰。吾亦可以已矣。吾跼蹐獄中。豈望有此哉。喪葬盡哀盡禮。里巷有不悅于父母者必稱述孝子以媿之。孝子名光位字明岩華亭人。遂東先生爲華亭教諭作傳以遺其子孫謹節錄之。同張行婆事告天下之以貽累爲怨者。○韓魏公曰。父慈而子孝。此常事不足道。獨父母不慈而子不失孝。此古



今所以稱大舜也。方正學四箴其一爲父母言也。箴曰。子孝寬父心。斯言誠爲確。不患父不慈。子賢親自樂。父母天地心。大小無厚薄。大舜日夔夔。瞽瞍亦允若。先賢名論衆矣。謹錄此二則。告天下之以不慈爲怨者。○腹誹父母。一事一過徵事。太原諸生王用予事孝謹稱。一夕用予夢至帝前。諭之曰。功名至秘。念汝至誠。十餘年如一日。爲汝析之。汝註上榜鄉科。因汝生平遇神前。輒求功名如意。妻楊氏白頭相保。孀母在堂。並未祈佑一語。以此遲兩科。在下榜五十二名。用予問俞麟命查之。云俞麟應得一科。因事親用腹誹法。故斥之。用予問何謂腹誹。曰。父母言語舉動。麟心輒不謂然。但勉強順之。真性日漓。僞心相與。視親如路人。最撓神怒。子須慎之。

◎有事出



外。不思念在堂父母。

一日一過。

**徵事**

劉璠少孤事母

至孝。每出外。繫念其母。不忘。後

以事往淮南。母居建康。邁疾。璠未之知。忽一日。舉身

楚痛。尋而家信至。報母病。璠卽號泣戒道。絕而復蘇。

當身痛之辰。卽母死之日。孝子之于其親。相關切如

此。

**附錄**

上海蔡琴崔諱懋廉。有少年姪善。乩仙萬歷

壬寅歲。一夕請仙。關真君降壇書曰。子來年癸卯必

發。上帝以子孝。在方寸。名次七十七名。次年以錄遺

入闈。中式名

次果不爽。

◎

遇一

甘旨

及歡樂處

不思親

**增註**

此指出外

所遇。故僅記一過。若在自己家中而忘親。則大不孝

矣。嘗讀沈龍江先生語。令人毛骨悚然。曰。世俗有父

子異居者。亦有同居異爨者。獨不思我之身。父母之

身也。乃思分爾我。析七筭。各食其食。各享其有。如路



人然。可乎。不可乎。假使我當食時。親猶未食。我能下咽耶。親當食時。不知旨否。于心豈安耶。夫妻以秦晉而同牢。父母屬毛裏而互異根本之地。薄已如此。更有何處可與人同。此雖習俗相沿。不可視為細故也。

**附錄**

唐贊明激勸歌有曰。父借茶鹽。子不賒。各人各自辦生涯。從今識破人間事。父子原來是兩家。歌特

甚其詞。要與沈

先生言同意也。

◎**母難日不思親**

縱酒快樂者加五倍。**發明**稱大孝曰

終身孺慕。孺慕者。無刻不念及也。偶然觸發。有動于中。自不容已。況于母難日乎。于此而不思。則已忘此身所自來。其所以孝于親者。亦無幾矣。**徵事**唐太宗謂長孫無忌等曰。今日吾生日。世俗皆為樂。在朕翻成傷感。今君臨天下。富有四海。而承歡膝下。永不可得。此子路所以有負米之恨也。詩曰。哀哀父母。生我



劬勞。奈何以劬勞之日。更爲宴樂乎。因泣數行下。左右皆悲。○趙公善應。生辰必哭於廟。元北麓處。十李自華嘗以不得終養二親。遇初度日。號慟抵暮。家人不忍見。因諱言之。程子嘗言。人無父母。生日當倍哀痛。安忍置酒張樂以爲樂。朱子亦謂須以忌日處之。**附錄**唐先生親恩歌數首。試爲忘親者朗吟一過。能不惻然生感。動其孝思。歌曰。我今未說淚先零。難報爺娘養育恩。自是斷腸談不得。斷腸談與衆人聽。○惟有懷胎受折磨。百般魔障好難馱。莫言產育無凶吉。生死須臾可奈何。○肚裏如今痛得慌。叫人爲我簡衣裳。千生萬死都難算。只靠神天做主張。○生下兒來血奔心。牙關緊閉眼翻生。直從剪下胞衣後。再過三朝纔是人。○尿尿時常撒滿身。腥臊臭穢不堪聞。却無半點嫌憎意。洗換頻番劇苦辛。○聽得娃兒



哭一聲。翻身就把手來擎。想他歲半週年內。一覺何曾睡得成。○大雪紛紛臘月天。偎頭偎臉把兒眠。只因嫗是孩兒吃。徹夜開胸在外邊。○聽得孩兒出痘瘡。登時嚇得眼翻黃。一從放出標來後。盡日何曾喫米湯。○磕箇頭來上炷香。聲聲只叫痘娘娘。若還叫得娘娘應。何怕頭穿出腦漿。○幸得兒生兩歲零。依檯傍櫬自能行。只愁跌破頭和面。掛肚牽腸不放心。○生得孩兒性氣歪。任他情性使將來。如何父母偏憐愛。還說垂垂這樣乖。○兒今頭髮已披肩。轉眼成人在面前。痛殺親心難割捨。不能長在膝頭邊。○縱然賺得幾文錢。受怕擔憂苦萬千。不是爲兒還爲女。自家吃得許多田。○娘看爺來爺看娘。爲何終日臉焦黃。只因兒女將婚嫁。相對愁眉做一房。○寸寸絲絲總是恩。誰能描得半毫真。蓼莪縱使能描畫。只好



依稀入

◎忌曰無哀慕心。

**發明**

李亦人曰。禮云。君子

有終身之喪。忌日之謂也。

人子遇此日。則宜追思景慕。哀痛迫切。而不容已者。故齋戒沐浴。素服黻巾。不飲酒茹葷。住宿于外。凡弔喪問疾。一切之事。皆不可預。以盡思親之誠。故曰忌日不樂。非不祥也。言夫此日志有所至。而不敢有所私也。**徵事**。劉師貞少年失母。及長。不記容狀。至忌辰。終日涕泣。追慕廢寢食。忽夢見母狀。及覺哀號。乃刻木爲像。敬事如生。每有時新之物。必先薦之。而後食。◎跬步不謹。致有損傷。**徵事**。樂正子春下堂而傷其足。數月不出。猶有憂色。門人問之。荅曰。吾聞之曾子。曾子聞之。夫子曰。父母全而生之。子全而歸之。可謂孝矣。不虧其體。不辱其身。可謂全矣。故君子跬步而不敢忘孝也。今余忘孝之道。



余是以有  
憂色也。

# ◎臨疾不慎。

**廣義**慎疾。其淺而易明者。在  
節食避風。戒忿戒慾。戒憂戒

勞。故有謂病中宜常看善書。則忿慾之患自息。有謂  
宜常與人蕭散。則憂勞之患自除。有謂宜學調氣坐  
功術。則風食之患可免。而其精要尤無如治心兩字。  
黃陶菴先生吾師錄。特著却病一條曰。宋李旼九河  
公語錄云。旼苦疴。旼瘳。請謁。公曰。子于病中。曾會得  
移心法否。旼對未也。公曰。人能于病中移其心。如對  
君父。慎之。靜之。自愈。金史楊雲翼嘗患風痺。得稍愈。  
哀宗問愈之之方。對曰。但治心耳。心和則邪氣不干。  
治國亦然。余謂此真刀圭之最良者也。未病時得此。  
可以不病。已病時得此。可以愈病。余昔在雲間大病。  
四體如炙。此心頗覺忙亂。因而自問曰。如果此病不  
起。只索委順。忙亂無益也。遂一念不動。至晚汗下如



雨。病竟痊。○郭伯康多病。遇神人授一衛生偈云。自身有病。自心知。身病還將心自醫。心境靜時。身亦靜。心生還是病。生時。郭用其言。康強幾百歲。◎遇有爭忿。不能禁抑。任性忘

親。極小事。爲一過。因而構成禍患。以危父母。爲五十

**增註**

愚按此條。當先知本過。此又于事親上加

記者。所謂本過。一則在行誼條曰。逞一小忿。一則在交接條曰。小釁可耐。不耐遽成一訟。至于構成禍患。皆從極小處啓之。不可不慎也。**附錄**胡文定曰。性猶火也。方發之。初滅之。甚易。旣炎。則焚山燎原。不可撲滅矣。○遵生八牋曰。心上有刃。君子以含忍成德。川下有火。小人以忿怒災身。◎父母賜書。當坐臥時。或南面立。拆看。一次一過。**徵事**顧悌每得父書。必整衣冠。跪拜讀之。



每句應諾畢復拜。若父有疾問至則臨書垂泣。語便鳴咽。至誠盡孝之人如是。

### ◎貧人有父

母在堂。不竭力奉養。喜行布施。及一切好名事。

費百錢爲

一過。若偶遇急難。惻隱之心萬不得已。而費錢者。非過。**發明**彌勒偈曰。堂上有佛二尊。懊惱世人不識。不用金彩裝成。非是旃檀雕刻。卽今現在雙親。就是釋迦彌勒。若能誠敬得他何用。別求功德。佛典又曰。人不先供養父母而布施者。是名惡人。釋家有此等論。深足觀也。**徵事**侍郎梅溪王公見人禮塔呼而告之曰。汝有在家佛。何不供養。太和楊黼辭親入蜀。訪無際大士。途遇老僧。僧問何往。黼曰。訪無際。僧曰。見無際。不見佛。黼問佛安在。僧曰。汝但歸。遇有穿某色衣。著某色履者。卽是也。黼遂回。一日抵家叩門。已昏暮。



矣。其母披衣倒屣出戶。正與老僧所言。衣履顏色。一相合。黼驚悟。自此竭力敬親。手註孝經數萬言。硯滴將乾。欲下取水。硯池已盈。人以爲孝感所致焉。

**伯叔**盡倫之二。○受恩師及母之兄弟妻之父母。

**伯叔**

俱參此條。

**總論**

袁氏世範曰。父之兄弟。謂之

伯父叔父。其妻謂之伯母叔母。蓋撫字教育。有父母之道。與親父母不相遠。而兄弟之子。謂之猶子。亦謂奉承報孝。有子之道。與親子不甚遠也。故幼無父母者。苟有伯叔父母。則不至於無所養。老無子孫者。苟有猶子。則不至於無所歸。此聖王制禮立法之本意。**廣義**旁註推及於師生之誼。不曰受業師而曰受恩師。其意精矣。天下有名爲師而毫無恩誼教益者。是所謂餽啜之徒。不幸而拜承下



風豈殊於途人也哉。非是之類。又當視其恩之淺  
淡。張子有云。師無定體。有得其一言一義如朋友  
者。有相親炙而如兄弟者。有成就已身而恩如天  
地父母者。與天地父母並尊。則視伯叔而更重矣。  
有如是之爲師者。其容不以子之事親者。以事之  
也。若夫母舅之次於伯叔。妻父母之次於母舅。遞  
而降焉。雖淺夫皆能道之。然就其間。亦有恩誼之  
各別。使母舅而不仁之甚。讐視夫我父我母焉。則  
其分雖定。其義可絕。又非等於伯叔之連枝共氣。  
雖無道而不可疎棄也。妻之父母。服不過緦。似乎  
輕矣。然而恩德所及。有終身沾被之而不可旣。或  
同於父之養育。或同於師之造就。此又不可以服  
論。我嘗聞諸先賢。謂服盡而情不盡。亦當心喪擬  
父母可也。循其分之自然。準其情之獨至。蓋甯過



於厚無失於薄。是所望於敦倫盡誠之君子。

**一功 致敬盡養**

一日一功。

**徵事**

崔孝芬有叔既沒與其

弟孝暉奉叔母李氏如奉所生旦夕溫

清出入啓覲家事巨細一以咨每兄弟出獲尺寸以上皆入李庫四時分資李自裁之如此者二十餘歲鄉邦稱焉○柳仲郢父既卒事叔父公權如事父非甚病見公權未嘗不束帶出遇公權於路必下馬端笏立候公權過乃上馬公權暮歸必束帶迎候於馬前公權屢以爲言仲郢終不以官達故少貶也○

**侍疾如所生**

一日一功能十日不怠另加十功。

**徵事**

○

生伯老無子鐸爲買妾遺腹生一男愛護保惜中夜審察不敢安寢弟有疾晝夜哀禱北辰曰吾父子可



去其一。勿喪吾弟。使伯父無後也。疾果愈。愚按格  
中語。此條尤難。必若扈君之至性。方能盡之。故誌其

事於

此。◎求順其心。不吝財物。

值百錢一功。徵事燕泰。肅王輕施厚費。常預借

料錢。多至數歲。仁宗詔給者屢矣。御史沈邈謂不可  
以常典奉無厭之求。上曰。御史誤矣。太宗子八人。今  
惟王耳。先帝之弟。朕之叔父也。每恨不  
能盡天下。以為養。數歲之祿。何足計焉。◎一事教導

順從。

三功。一事責怒順受。◎代受一勞苦。◎承一非禮之命

不曲從。不直拒。能委婉為辭。愛尊長以德。



**十功** 忍受一難忍。○一事有違倫理。委曲勸諫使之悅

懌見從。

**二十功** 守一正訓。處變不違。

**附錄**

楊惠元爲神策將軍

德宗發京西兵戍關東親

御望春樓宴勞之。神策將士獨不飲。上使詰之。惠元對曰。臣等發奉天。軍帥張巨濟戒之曰。此行大建功名。凱旋之日。相與爲歡。苟未捷。勿飲酒。故不敢奉詔。及行。有司緣道設酒食。獨惠元所部。餅罌不發。卑幼奉尊長教戒。○服喪至誠盡禮。不徒飾耳目。

**徵事**

何

叔度晉

時爲尚書。姨與母情愛甚篤。母卒。奉姨若所生。姨亡。朔望必往致哀。并設祭奠。食並珍新。躬自臨視。若朔



望有公事。則先遣送祭。皆手白料理。流涕對之。公事畢。卽往致哀。以此爲常。期年之後。哀慕不輟。人服其純行。**附錄** 吳臨川曰。喪禮制爲斬齊功。總之服者。其文也。不飲酒食肉處內者。其實也。中有其實。而外飾之以文。是謂情文之稱。徒服其服。而無其實。則與不服等耳。雖不服其服。而有其實者。謂之心喪。心喪之實。有降而無殺。服制之文。有殺而無隆。古之道也。朱子曰。聖王不定師生服。從其恩。自爲隆殺。故曰心喪。翁賓僭。僭父翁。常服以總。心喪如師。

三十功 遇急難。盡心出力。出財則另記功。

五十功 代爲貧乏從兄弟喪葬。至誠盡心力。論錢記功外。另加五



十功。

**百功** 既長爲之嗣。誠敬心無異所生。逐事記功外。另加百功。

**三百功** 見惡於伯叔能積誠感動。

**三百過** 視急難可出力者。巧爲規避。

**徵事** 正統時李時勉爲祭酒抑奔競

別賢否隨才造就恩義兼盡爲王振所害枷於監前諸生皆伏闕薊州石大用獨請代罪曰民生於三事之如一時勉年老風疾况值炎熱死亡無日乞容臣代枷以全師生恩義上併釋之由是知名是秋中式遂銓戶部主事○宋喻南疆從陳亮遊時當路欲排善類指亮爲根非法煅煉門人不敢出言南疆誚責



同門。謂陳先生無辜蒙罪。吾曹爲弟子。影響昧昧。是得爲人類乎。卒爲白其寃。○漢郭亮從李固學。固忤梁冀被誅。戒收屍者同罪。亮時未冠。詣闕上書。乞收固屍。不許。因往臨哭。守喪。太后聞而憐之。觀此三事。足令巧爲規避者愧死。

百過 貧乏無養不顧。富厚有餘者加倍。

五十過 忘莫大殺戮讐怨。可報不報。

三十過 遇喪葬力能捐助。勉強不肯爲。○藏一怨不忘。

增註

此必其甚難忘者。然已不免於過矣。若可忘者而不忘。則加倍記過。



十過見大過不婉勸。○小事抵觸。若故出惡言忿爭者。加倍論。增註倘伯叔

苛責無道。不能無荅。亦宜和婉其辭。不可自蹈抵觸之過。○播揚一惡。人不知而播之者。加

五倍。○以上處從伯叔及母兄弟妻父母俱減半論過。惟報仇一條。只主伯叔

五過遇規勸恚怒。徵事唐彬已為諸生。從章瑄學。嘗令作經義。作色令改。重進復拒。如是者

三。至擲地而彬容色自若。瑄乃曰。此子可教也。後與瑄鄉會同榜。官至御史。觀此則知恚怒之不可矣。

○代任一小事不盡心。徇私誤事者加倍。若於財上苟行。另論錢記過。○雖

逆加不恬受。致忿形於色。發明即不形諸色。而內念微有忿之之意。猶為德性



未純當其時也。惟自思曰：此吾父之鴈行也。則益務婉其容，愉其色，不特盡弟之道，亦以盡孝之心。是以上文許記十功，重嘉之也。

**三過聞病不候。**有事則免。◎善言不聽。

**一過褻狎不敬。**一事一過發明。此即感應篇所謂慢其先生也。宋游酢楊時在伊川先生門一

日進見伊川，瞑目而坐。二子侍立不去。既覺，門外雪深尺許，毫無怠容。執禮愈謹。侍師如此，則待伯叔可知。○施鄰溪可大，年六十餘，鬚髮皤然矣。與客對坐時，有族叔在襁褓中，乳母抱而過焉。鄰溪忽竚立，客問故，荅曰：家叔抱過成宏間人物，深於詩禮如此。鍾祥毓秀，曾孫連登科甲者三人。◎背後一



稱道名號

當面一爾汝稱者全。**徵事**朱子曰近世故

居相呼。外姓尊長必曰某姓第幾叔。若兄諸姑尊姑之夫必曰某姓姑夫某姓尊姑夫未嘗敢呼字也。其言父黨交游必曰某姓幾丈亦未嘗敢呼字也。

○客一財物違其心○年老

不堪強之任勞

一日一過增註指供養日言。

○年老殘疾生一厭

薄心

一念一過

○一二月不晤不一念

增註遠則念近則便宜候矣。

○

重病可憐虛支候視漠無關情

○服喪衣冠如常

次一

一過若大違禮度加十倍。**發明**按律期親尊長喪如喪制未終釋服從吉忘哀作樂及參預筵宴者杖六



十。朱子集居喪之則。謂期喪未卒哭。當如三年之喪。已卒哭。有不得已事。則衣墨衰行之。或可已者。亦不必出。在家受弔接賓客。皆衣喪服。卽功緦等服。決不容有行慶禮。及召人赴人酒食之事。其簡端題曰。喪禮。備存諸經。五服制度。著於令甲。釋服作樂。律有明刑。近世居喪。或輕或重。或服或否。居處飲食出入之節。都無所變。衰麻月數。雖有差等。殆成空文。遠則棄先王之禮經。近則犯本朝之法令。

### 兄弟

盡倫之三

總論

許魯齋曰。兄弟同受父母。一

氣所生者也。今人不明理義。悖逆天性。生雖同胞。情同吳越。居雖同室。迹如路人。以至計分毫之利。而踈絕至恩。信妻子之言。而結爲死怨。豈知兄弟之義哉。○顏氏家訓曰。兄弟者。分形連氣之人也。方其幼也。父母左提右挈。前襟後裾。食則同



案衣則傳服。學則連業。遊則共方。雖有悖亂之人。不能不相愛也。及其壯也。各妻其妻。各子其子。雖有篤厚之人。不能不少衰也。姊妹之比兄弟。則踈薄矣。今使踈薄之人。而節量親厚之恩。猶方底而圓蓋。必不合矣。惟友悌淡至。不爲旁人之所移者。免夫。○胡振安曰。吾邑節孝朱先生曰。人家兄弟。常作二想。則無不爲友。兄恭弟矣。二想者。何當養。生。送死時。應作譬如父母少生一子想。當析產授業時。應作譬如父母多生一子想。此真至論也。獨今人以兄弟多人之故。而於爲父母用財。則互相推諉。當爲者不爲。至使父母生失養。死不葬。而不顧及受父母之財。則互相爭競。不當爲者亦爲。在往富者。破家。貧者愈貧。而亦不顧。噫。當父母生子時。多生一子。則多增一喜懷。謂蕃衍之可慶也。今



若此。則是多生一子。卽增一禍害。不如不生之爲愈也。言及此。其亦可痛也夫。抑又有情意踈落。兄弟經年會面亦稀者。此則雖無兄弟之患。而鮮兄弟之樂。吾亦甚爲惜之。**附錄**邵康節先生孝悌歌十首。一曰。子養親兮弟敬哥。休殘骨肉起風波。劬勞恩重須當報。手足情深最要和。公藝同居今古罕。田真共處子孫多。如斯遐邇皆稱美。子養親兮弟敬哥。二曰。子養親兮弟敬哥。怡聲下氣要謙和。難兄難弟名偏重。賢子賢孫貴自多。負米尚能爲薄養。讀書甯不耀高科。仲由陳紀皆如此。子養親兮弟敬哥。三曰。子養親兮弟敬哥。訓賢妯娌事翁婆。好遵孟母三遷教。須讀張公百忍歌。孝友睦婣兼任恤。智仁聖義與中和。當時曾子同楊播。子養親兮弟敬哥。四曰。子養親兮弟敬哥。天時地利與



人和莫言。世事常如此。堪嘆人生有幾何。滿眼繁華何足貴。一家安樂值錢多。奇哉讓果與懷橘。子養親兮弟敬哥。五曰。子養親兮弟敬哥。光陰過去疾如梭。庭闈樂處兒孫樂。兄弟和時妯娌和。孝弟傳家名不朽。金銀滿櫃富如何。要知美譽傳今古。子養親兮弟敬哥。六曰。子養親兮弟敬哥。晨昏定省莫蹉跎。一門孝友真難得。百歲光陰最易過。和樂且耽宜自翕。彝倫攸叙在謙和。斑衣舞罷填篴奏。子養親兮弟敬哥。七曰。子養親兮弟敬哥。丈夫休聽室人唆。眼前金帛母嫌少。膝下兒孫不厭多。但得家和貧也好。若教不義富如何。王韓孝友垂青史。子養親兮弟敬哥。八曰。子養親兮弟敬哥。休傷和氣忿爭多。偏生嫉妒偏艱窘。暗積私房暗折磨。不孝自然生忤逆。無仁定是出妖魔。但聞孝弟



傳千古。子養親兮弟敬哥。九曰子養親兮弟敬哥。莫因微物遽傷和。黃金櫃內休嫌少。陰陽冥中要積多。私曲豈如公道好。剛強無奈善柔何。古今簡策多名譽。子養親兮弟敬哥。十曰子養親兮弟敬哥。吁嗟分析聽搬唆。囊中財物他嫌少。祖上田園你要多。夫婦眼前雖快樂。兒孫日後恐消磨。何如孝弟推鄉黨。子養親兮弟敬哥。

**一功 一日敬兄愛弟推逸任勞。**

**增註**侍疾晝夜無少怠者同。敬愛盡禮。獨勞自

甘。一日之間。爲端非一。總而計之。止記一功。疑不當如是之輕也。及讀交接條。凡抑已讓人處。纖細爲功。而有註云。除事親外。待伯叔兄弟俱同論。則知一事一節。詳於交接條中。此特於兄弟畧舉其端焉耳。讀



是格者。固貴於叅求之也。**徵事**漢姜肱博通五經。名重公卿間。與二仲友愛天至。寢嘗同被。夜俱詣郡。遇盜欲殺之。肱曰。弟年幼。父母憐愛之。又未娶。願以身贖弟。仲曰。兄年德在前。爲家寶。爲國俊。願受戮全兄。盜乃劫其衣服而去。旣抵郡。郡人見肱無衣被。問故。肱託以他事。終不言。盜聞感悔。詣肱叩頭謝。還所掠物。臨難而推任若斯。平時何難自勉也。○隋房景伯少喪父。以孝聞。貧傭書以供養。因涉獵書史。弟景先幼。不能遣從師。母授之毛詩曲禮。景先年十二。自請其母曰。豈可使兄傭賃供景先學乎。請自傭得衣。然後學。景伯哀其少。不許。力請乃許之。已得一羊裘。忻然自足。晝樵蘇。夜誦經史。遂通瞻爲名家。事伯如事父。出告反面。晨昏叅候。側立移時。伯危坐。與相敬如賓。伯寢疾。弟侍湯藥。衣不解帶。容爲毀瘁。季弟景遠



性小急。然事二兄至謹。撫兄孤甚恩。不替其家風。幼弟亡。伯仲蔬食終喪。期不御內鄉人爲之語曰。有禮有義。房家兄弟居常共處。盡當以爲法焉。◎一家事已不能爲兄弟任之。

**常抱不安。**

一念一功。

**徵事**

少卿盧崇道抵罪。逃匿陸

言。匿崇道者我也。請死。南金固言。弟自誣。不情。御史怪之。趙璧曰。母未葬。妹未歸。兄能辦之。我生無益。不如死。御史驚。上狀。帝皆宥之。余於此事。深嘆其推重兄之能辦。而愧恨已之無益。此一念也。豈待爭死之日而後有之。其平時之輾轉不自釋也。固已久矣。故臨事而自輕其死也。兄弟之間。正貴其不忘此念。則格中所云。敬兄愛弟。推逸任勞。安有不至哉。○施邦顯因弟邦直會試北上。已亦以省祭謁選。邦直與嚴



溪亭爲友。素重嚴。邀之同赴公車。凡經營舟車飲饌。悉邦顯爲料理。不擾弟心。而推弟敬愛。并不費嚴公一文也。一日嚴公食少減。邦顯夜思其故。曰。想無羹。卽令庖者具羹。公果啜羹加餐。邦顯喜動顏色。又一。日遣伴回。已復閉門伏枕而泣。邦直驚告其友曰。吾兄泣何也。友入問。邦顯拭淚告曰。無他。頃作家書。囑付弟偉。經紀家事。因思弟年未及冠。正須從師讀書。遇節日放假。與羣從歌笑宴樂。其事也。今吾侃弟大事。不可已者。吾螻蟻異塗。顧亦拋家遠出。而以勞事畀之。吾是以悲焉。吾其歸矣。倪汝遷曰。吁。凡人子養親。視食多寡爲憂喜。亦可謂孝矣。而邦顯於鄉先生。乃爾。其尊賢之誠。何如耶。家事委弟。不爲甚苦。而至於泣下。其友愛之篤。又何如耶。



十功 容忍一過不聽婦僕讒言。

待兄弟之子同徵事周

酒仰燦爲生。兄醉毆燦。鄰人不平而詈之。燦怒曰。兄

未毆我。如何離間我骨肉也。司馬溫公嘗書其事以

誠人。○視兄弟及兄弟之子急難無異於已。凡可効力

心謀之。不憚勞苦。不惜錢財。事賴以濟。另加百功。徵

事宋太祖友愛太宗。數幸其第。太宗有疾。親爲灼艾。

太宗覺痛。帝亦取艾自灼。以分其痛。若此至情。方不

愧格中斯語。○齊攻魯至郊。見婦人携一子。抱一子。

衆逐之。乃棄所抱。取所携者。抱而奔。逐得之。問抱者

誰。曰。兄之子。棄者誰。曰。已子也。軍至。妾不能兩全。故

棄所生而抱兄子。齊軍曰。子之於母。甚痛於心。何忍

棄乎。曰。吾夫尚存。可望生育。此孤兒。吾父兄止此一



綫存之以延宗祀。齊師曰：魯之婦人猶持節行，其可伐乎？撤軍而返。魯君聞之，賜束帛，號曰義姑。○至正壬辰，黃州妖賊自閩犯龍泉，贊善章溢同姪存仁避亂山中，存仁爲賊獲。公曰：吾兄止一子，不可使無後。出語賊曰：兒幼無知，我願代兒。固請免姪之戮。至於號慟，賊義之，俱得釋。噫！若魯義姑與章君，視格中語，更逾情矣。誠難矣哉。

二十功

兄弟有違行，至誠誘化，使感悟悅從。

**增註**

此條

雖列二十

功。然有遲速難易之分。苟令悖違之甚，不易挽回，而能有以化感之，此其深心盛德，蓋非可以億量也。○化兄弟之子，視兄弟稍易焉。然以其功言之，則必同論也。原文闕如，敢補之。**徵事**皇甫謐幼時養於叔母



叔母見其不學。嘆曰。昔孟母以三徙成子。曾父以烹豕存教。豈我居不卜鄰。何爾魯之甚乎。修身篤學。自汝得之。於我何有。因對之流涕。謚乃感激。就鄉里席坦。受書。遭人而問。無有甯日。卒成大名。

◎服

喪至誠盡禮。

待兄弟之子同。

徵事

荀匠。晉太保勗九

絕。身體皆冷。至夜乃蘇。既而奔喪。每宿江渚。商旅不忍聞其哭聲。天監元年。其兄斐爲鬱林守。征賊。爲流矢所中。死於陣。喪還。匠迎於豫章。望舟投水。傍人赴救。僅而得存。及至家。貧不能葬。居父憂。并兄服。歷四年。不出廬戶。自括髮。不復櫛沐。髮皆禿落。哭無時聲。盡則繼之。以泣。目眦皆爛。形骸枯瘁。僅餘皮骨。雖家人不復識。郡縣以狀言。武帝詔遣中書舍人。爲其除服。擢爲豫章王國左常侍。匠欲辭。外祖孫謙誠之曰。



主上以孝臨天下。汝行過古人。故擢汝此職。非惟君命難拒。固亦揚名後世。所顯豈獨汝身哉。匠乃拜。○辛普明河南人。居貧。與兄共處一帳。兄亡。帳施靈床。卧。寢靈床下。膚受蚊螫。惟嗚嗚念兄而已。比葬。人士高其行。各贈金資助之。後至者不復受。人間其故。荅曰。本以爲兄贈也。以營葬不周。故不逆其意。今幸已足。豈可利亡者。餘贈以自爲耶。

三十功

同居合爨。毫無間言。

一年爲三十功。**徵事**張顯

人百餘口。無間言。日。群。諸女婦處一室。爲女工。工畢。歛聚一庫。室無私藏。生子互相抱哺。兒不知孰爲已母也。顯卒。弟閏以家事傳其子聚。聚辭曰。叔父在。宜主家。閏曰。宗子也。宜莫如侄。卒傳聚。縉紳家自謂不



如也。至元中表門。○茅信卿泰州人。四世同居。舉家百餘口。每日一家長坐堂上。卑幼各以序立。拱手聽命。分任以事。畢則復命。其有怠惰。輒鞭辱。無有怨言。雖祁寒盛暑亦如之。州守霍仲順聞於朝。旌表其門。曰四世孝義之門。○江州陳氏。陳宜都王叔明後。唐時有名崇者。爲江州長史。廣置田園。擇羣從兄弟掌其事。建家塾。立家法。群子弟教之。至宋初。旣十有三世矣。長幼七百餘口。每食必群坐廣堂。未成人者別席。少事長。卑事尊。不畜婢僕。僕作使。上下睦。親家畜犬百餘。一牢食。一犬不至。羣犬爲之不食。鄉里率化。爭訟稀少。開寶初。州守張齊賢上其事。免其家繇。愚按陳氏每食必群坐廣堂一節。此同居合爨第一義也。昔楊椿誠子孫曰。吾兄弟家居。不忍別食。不異居分財。比聞汝等頗有別齋獨食者。此漸不可長也。楊



椒山公遺訓亦有云。四季衣服。兄弟妯娌必一樣。每飲食。兄弟同一處。妯娌同一處。不可各向自己房中。夫婦同食。此卽嫌隙所易生也。豈非洞見事理之言乎。○鄭濂。浦江人。自七世祖垂訓。子孫守之。凡二百年。不別籍。郡守扁其門曰。天下第一家。明太祖召至京。問曰。汝何以名天下第一家。對曰。臣合族共爨。已八九世。本府知府以爲可勵風俗。故加以扁名。上曰。汝家食有若干人。對曰。一千有奇。上曰。千餘人同居。眞天下第一家也。因問治家長久之道。對曰。惟克守家法。不聽婦人言而已。上深嘉之。適河南進香梨。因賜二枚。濂雙手擎梨於首趨出。上命校尉覘之。至家召族人立兩旁。向闕叩首謝恩。置水兩大缸。碎梨入水中。分飲其水。使者還報。太祖大喜。後有訐其家與權臣通賄。太祖曰。鄭門無是也。誣之耳。尚書嚴震荐



其家世孝友。上命簡其子弟三十以上者二十四人。至京並授之官。宗長漢詣闕謝恩。上親書孝義家三。大字賜之。識以玉璽。○張公藝九世同居。唐高宗幸其宅。問所以能睦族之道。公藝書忍字百餘。以進其意。以爲宗族所以不協。由尊長衣食或有不均。卑幼禮節或有不備。更相責望。遂爲乖爭。苟能相與忍之。則家道雍睦矣。○司馬溫公曰。國朝公卿能守先法。久而不衰者。惟故丞相李昉家子孫數世。至二百餘口。猶同居共爨。田園邸舍所收。及有官者俸祿。皆聚之一庫。計口日給。餉婚嫁喪葬。皆有常數。分命子弟掌其事。其規模大抵出於翰林學士宗諤所制也。○宋鄆州盧縣尉許永上言。父瓊九十七。長兄八十一。次兄七十九。永身七十五。願得一近便差遣。以就榮養。太祖命召其父。旣至。敷奏詳敏。詞氣不衰。太祖敬



嘆曰卿一門如此必有大過人者。瓊曰無他。但累世義聚不分耳。太祖曰此卽卿大過人處。立命賜襲衣腰帶及綵緞馬疋。與永近便差遣一任。從其志也。○宋時聖節優禮老人。惟吳元嗣一門有八十九十一百以上者八人。內吳琬一百一十有四。步履輕健。詢其所致。亦累世義聚不分。詔賜一官。旌表門閭。門外又築義順土臺二座。立二株華表。鶴柱。隆異其禮。人皆倭爲盛事。愚按義聚之門多高年者。一則和氣所鍾。二則各無門戶。統於一人。主持餘皆熙然自得。宜其享壽長也。或疑食口日增。奚所資給。能無憂慮。倍淡。不知義聚之門。法度謹嚴。必無游手子弟。人各有職。職各有課。嘗觀農夫小民。父子四五人同居。則可廣耕豐獲。諺謂之兒熟。里爭羨之。豈有以人多食乏爲慮者乎。惟其各有職業也。則當其少時先無滯佚。



之傷。而老景又得以優游有托。欲不壽而不可得也。  
○趙毓。唐州人。父祉。遷鄭之管城。其先三世同爨。毓  
官福州司獄。以母老不復仕。一日會諸弟。泣申遺訓。  
願世世無異處。且祝天歃血以盟。自是大小百口。畧  
無間言。同力合作。家道以殷。元貞初。旌表。陸虞公曰。  
家道之衰旺。惟視其一家之人。以卜凶吉。未有和氣  
萃焉。而其家不昌隆者。若昌隆之家。將衰。必先有戾  
氣凝結不解。而非意之殃隨之。吾嘗歷驗而信其然  
矣。豈必術士之占測哉。○張誠。田家子也。自祖瑄至  
誠。六世同居。歷二百餘年。親丁數百。內外和睦。始終  
如一。衣服之類。皆無常主。每日家長坐堂上。子弟列  
堂下。以次受職。罔不祇勤。他日誠夢一神人謂之曰。  
汝以敦倫。名列天府久矣。及卒。舉棺輕如蟬蛻。○遇重病。躬治湯藥。盡心保



護待兄弟之子同增註

如至廢寢忘食竭財醫禱賴其力以得痊則于本功外另加百功照急難無異

於已之條也

徵事

李勤姊嘗病勤已爲僕射親爲燃

火煮粥風回熱其鬚鬢姊曰僕妾幸多何自苦如是

勤曰非爲無人使令也顧姊老勤亦老雖欲常爲姊

煮粥其可得乎○晉咸寧中大疫庾袞二兄俱亡次

兄毗復危殆癘氣方熾父母諸弟皆出次於外袞獨

留不去諸父兄強之乃曰袞性不畏病遂親自扶持

晝夜不眠其間復撫柩哀臨不輟如此十有餘旬疫

勢旣歇家人乃反毗病得痊袞亦無恙父老咸曰異

哉此子守人所不能守行人所不能行遠近重之稱爲庾賢而不名

◎分產惟兄弟所

能行遠近重之稱爲庾賢而不名

欲不發一語不存一檢擇心

徵事

五代張士選幼與

叔同居叔有七子一日



叔欲析箸分產爲二。選曰：「不忍諸兄弟共止一分。可分爲八。彼此固讓。卒如選言。年十七。預薦入京。一術士見曰：「此少年滿面陰德。必登高第。放榜果然。夫同胞兄弟。猶有素必然者。乃其待從兄弟如是。獲報宜哉。」

◎兄弟之子貧廢習業爲之延師

一年爲三十功

◎兄弟

之子貧不能婚爲之娶及爲兄弟再婚

一人爲三十功發明觀范

文正公義學義田。舉宗咸資賴焉。或猶得而諉諸力薄。若夫同胞兄弟之間。苟稍稍充足有餘。當亦不難勉而爲矣。友愛者其念諸。

五十力獨任一大事無矜心

徵事

京三郎隆興人。昆季三人。建炎間。金人至。郡守



以城降虜。虜將還。從郡索少壯三千。使負荷資裝。郡乃戶取一丁。其大父議孰可行。伯仲皆難之。三郎毅然請曰。伯仲皆無脫身計。不可往。我當行也。虜使少壯止城南四十里。翌日未明。虜騎奄至。奪取衣服畢。悉殺之。三郎被傷墮水。伏於河之土嵌中。逮晚無人。乃登岬。傷且困。露寢於草莽。達旦。覺有人坐其旁。問爲誰。則曰。我一夕守汝矣。汝曷起求朝餽耶。三郎告無衣可着。守者爲其就河解溺死者衣數條。去其水畢。則曰。從此東去。有僧寺可憩。以待虜盡。則歸。於是告別。竟不知其爲誰。郎乃東行。果得僧寺。郎雖土人。未知有此寺也。寺中逃難者甚衆。僧爲作粥給之。後三日。揆虜去盡。乃還城。城中蕭條無人。父及二兄皆不見。郎渡水求之。相遇於途。還故居自是。生事日增。不時致富。乃取親戚之貧困者。悉撫養之。郎爲人廉。



謹質直。雖日從事於市利。而語言心術。一無所欺。既而長子仲遠登科。八年遂至丞相。封贈三郎。至朝請郎。云。郎。◎兄弟貧未能葬。不獨營生壙。◎兄弟相為師友。

### 德行學業各自輸誠集益

百功親歿後撫幼弟至成立過於已生。

兄弟之子早孤。撫養至成立者。

同論

**徵事**

漢許武會稽人。父卒。門戶單微。有二幼弟。

武日則躬率僮僕。耕田種地。夜則挑燈讀書。耕種時。二弟雖未勝鋤耰。必使從旁觀看。讀書時。坐二弟於旁。將句讀親口傳授。細為解說。教以禮讓之事。成人之道。稍不率教。輒跪家廟前。云。武無德。不能化誨。願父母有靈。啓牖之。直待二弟號泣請罪。方起。不以疾。



言遽色相加也。室中兄弟三人同卧起。如此數年。二弟長成家漸裕。有勸武娶者。答曰。娶妻易生嫌隙。恐傷我手足之情。鄉里稱為孝弟。許武州牧郡守交章薦舉。朝廷徵拜議郎。隨解組歸。先與二弟議親。後方自娶。同居和氣。後二弟聲名亦著。明帝拜為內史。人皆稱為友悌之報云。

◎兄弟同爨視

兄弟之子與已子無異情

**徵事**

唐元魯山先生貧時

其兄早亡。有遺孤期月。其嫂又喪。無乳哺之。魯山晝夜哀號。抱其兄子。即以已乳含之。涉旬日而乳遂有。汁兒得長大。此真篤天倫之至者。○殷近仁家貧。與弟原善。友愛無間。洪武初。近仁舉孝廉。官廣西。與妻俱卒。官所遺三男一女。咸幼。原善遂不娶。撫諸孤如已出。或諷之娶。原善泣曰。我非不欲有室家之好也。萬一娶而不賢。則諸孤不



淡。可。慮哉。

◎幼年失怙。事長兄長嫂。終身極盡誠敬。不異

父母。

**徵事**

司馬溫公兄伯康。年將八十。公奉之如嚴。父保之如嬰兒。每食少頃。必問曰。得無饑乎。少

寒。必撫其背曰。衣得無薄乎。○嚴溪亭先生鳳致仕

歸。兄老而貧。迎養於家。凡宴客。必兄遞盞。自執箸從。

一日進箸稍遲。兄怒批其頰。欣然受之。終席盡歡。既

醉。送兄歸臥。日未明。已候榻前。問昨飲暢否。臥安否。

兄尋卒。哭葬盡禮。朱在菴曰。以貴弟而敬貧兄。已屬

今人所難。況小故而批之。衆客前乎。嚴公不可及矣。

三百功

財物不論。爾我終身如是。

**徵事**

趙彥霄與兄彥

雲同。纔十二年。彥雲

遊浪費業。霄諫不聽。遂求析箸。甫五年而兄產蕩盡。索逋盈門。一日霄置酒。語兄曰。弟初無分意。以兄不



節敬爲兄守先業之半亦足以供朝夕請歸仍主家  
政卽取分契焚之付以筭鑰更出所蓄爲償諸貧兄  
慚受而改轍焉次年  
彥霄父子同登進士

◎周給異居兄弟及兄弟之子

貧乏不少怠無德色

**增註**

格中條例無不計錢准功

力之可盡者必竭盡之而無憾倘心力有未盡  
卽偶費錢終於孝弟有虧也故獨不計錢准功

◎兄

弟以非義相加終身惟知自盡毫髮無間

**發明**

橫渠

先生曰斯

干詩言兄及弟矣式相好矣無相猶矣言兄弟宜相  
好不要相學猶似也人情大抵患在施之不見報則  
輟故恩不能終不要相學已施之而已○張拱辰曰  
兄弟之間不論施報惟當各盡其心而已豈可以兄



友而弟不恭。遂廢其友。弟恭而兄不友。遂廢其恭。而因施爲報。將使一本之愛。作市井交易之道哉。**徵事**謝述字景先。少有至行。事兄盡誠敬。莫有及者。次兄景仁素憎述。遇之無禮。及景仁病。述盡心事。湯藥飲食必嘗。而後進衣不解帶。不盥櫛者累旬。景仁深感愧。友愛遂篤。

**三百過**視兄弟及兄弟之子困厄。力能救助。漠情不卹。

**徵事**劉徹屢舉不第。夢神語曰。汝生平見善不爲。且有虧德。何望登第。徹訴生平並無虧德。神曰。汝弟負官錢不能助。忍令受杖。非虧德乎。徹以弟不肖爲解。神曰。見行道之人且不忍。何況兄弟。汝不知朱軾代納青苗事耶。將獲爲善之報矣。徹覺訪於軾。軾曰。今年某從館歸。途見械繫者。云欠青苗錢二千五百。因



以束修與之。不意已蒙神契。後軾三子皆顯官。

◎親歿後視幼弟異於已生。

**徵事**

唐岑文本弟文昭爲校書郎。多交輕薄。太宗不

悅。謂文本曰。卿弟結交多過。恐爲卿累。朕將出之。文本曰。臣弟少孤。老母特所鍾愛。未嘗信宿離左右。今若出外。母必愁瘁。無此弟。是無老母也。容臣歸。極言勸誠之。因泣下嗚咽。上愍其意而止。蓋愛親未有不愛弟者。不友之人。卽兼不孝。異於已生。其爲友也。幾何。○胡振安曰。長兄之於幼弟。猶父之於子也。或親老。或親歿。而下有幼弟。則衣食之事。固在長兄。其從師娶婦。授產三者。亦當任之。就三者之中。從師娶婦。所不必言。至授產一節。往往酌量而與。不能與已子爲同。然人重謀生。爲長兄者。誠能以親心爲已心。卽親無所授。已所營產。不惜割以畀之。則友也而孝兼。



盡矣。至於兄弟早世。所遺孤寡。尤當矜恤。既不幸不能於兄弟致其情。庶於此而致其情。且此煢煢者。我不盡力撫存。我不嫁娶成立。又將誰仰。文王發政施仁。必先鰥寡孤獨。吾輩用心。皆當如是。寧有門以內之孤寡。而反膜外視之乎。

◎欺凌異出庶出兄弟

增註

由親而始。則莫切於此矣。謂細微節目處。隱有欺凌之意也。若助其母暴虐不仁。干過不足以盡之。

徵事

王祥事繼母朱氏盡孝。而

朱不慈。每加楚撻。所生子覽。輒涕泣抱持。朱又置酒酖祥。而覽知其意。徑取酒飲之。朱驚覆酒。覽之。婦亦與祥婦。服勞如一。以致朱氏感豫。復爲慈母。後呂虔有佩刀。相其文。謂有德而佩之者。位至三公。虔以贈祥。祥果位登太保。壽至八十五。祥薨。以此刀授覽。後果九代公卿。姚龍懷曰。嗟乎。人皆知王祥之孝於繼



母而不知王覽盡弟道於異母之兄。以全其生母之慈爲大孝也。王覽取酖徑飲其一節耳。至彼晨昏定省之間。朱氏獨處無人之際。其叩頭流血。宛轉勸諭於生母之前者。日不知其幾人。不得聞史。又安得載也。痛哭流涕之言。出於嫡親骨血之口。如滴溜穿石。石雖難入。一入之後。滴滴不差矣。不然。祥雖勤孝。豈能輕化朱氏之毒心哉。迨其後。祥雖位登台司。而覽之後。累世爲公卿。其食報且浮於祥。卽請朱氏而較量之。使酖祥而悉取其產。以與覽。其所得與此孰多也。○歐公池嫡母所生兩兄。皆庶出。父以公嫡故意欲厚之。公妻馮氏請於舅曰。嫡庶爲父母服。有差等乎。舅曰。無。馮曰。三子皆舅所出。服無差等。財產其可異乎。舅大悅。從之。累世簪纓不絕。夫子無嫡庶。人人知之。而人人昧之。馮氏獨曉然不惑。豈非巾幗中丈夫。



夫乎。

百過爭產不睦。

徵事

蕭修撰與成光祿公與縈兄弟甚

相友愛年五十猶同嬰所營悉出公不

以煩光祿諸子婚畢乃爲光祿繕宅第舉其業均昇  
之光祿謂兄子凡六而已子止二不欲使二人均六  
人業辭不受公曰先君之愛若猶我也我知弟與我  
一體不知其他讓而弗決請於其母太夫人母命以  
十四與光祿乃止後二公俱陟顯仕子孫義讓不衰  
累世科第○清河太守蘇瓊好以禮讓化民有乙普  
明者兄弟爭田自前守時經年結訟各相援証公召  
諭之曰天下難得者兄弟易求者田地假令得田地  
而失兄弟心如何因而淚下諸證無不感泣普明兄  
弟叩頭乞外更思遂還同居終身和睦○歸安施佐



字相之。弟佑字翊之。兄弟俱爲知州。致仕家居。以田產參差。有唇齒之釁。親友日爲處分。不能解。同邑溪亭嚴公。素以孝弟著聞。是時偶遇翊之於舟中。語及產事。公顰蹙曰。吾兄懦。吾正苦之。使得如今。兄之力。量可以盡奪吾田。吾復何憂。因揮涕不已。翊之惻然感悟。遂拉溪亭同至兄宅。且拜且泣。淚自悔責。而相之亦涕泣慰解。各欲以田相讓。遂友愛無間言。人咸稱嚴以誠感。施以誠應。鄉邦美事。至今二姓皆蕃衍。人猶樂談其事云。**附錄**方正學四箴其二爲兄弟言曰。兄須愛其弟。弟必恭其兄。勿以纖毫利傷此骨肉情。周公賦棠棣。田氏感紫荆。連枝復同氣。婦言慎勿聽。

五十過 漠視同胞。幼弟及兄弟之子。教學有失。不規有



善不獎。從兄弟減半論。**徵事**陸九思字子彊幼弟子

多欲許之子彊力以爲不可。是年子彊適生子渙之。謂其妻曰。我子付母。婦乳之。爾可。且乳小叔。其妻欣然從之。子靜既長。事兄嫂如事父母。守荊州時。上書於兄。以郡政告。子彊猶責其矜功。其方正如此。每有家問。訓飭子姪。淡以不識禮義爲憂。子靜先生道德名儒。千古瞻仰。豈知磨礪追琢之功。得於早諭教者。亦賴其長兄有以相成云。

◎漢視異居兄弟及兄弟之子貧乏卽

有周給。出於必不得已。◎兄弟貧未能葬。僅爲自己

營生塋。

**增註**

處從兄弟亦宜。惟力是視。格雖不舉。其過。然理則可推。力厚者未必無責備也。**徵事**



莆田林氏之先有字用賓名觀者嘗厚待一異人異人指一嘉地曰葬之公卿盛於麻粟慮君福德未足以當此公曰吾德則薄吾福則淺但得此地而與宗族共之豈無一二足當之者異人嘆曰卽此一念福德固甚厚矣遂指穴授之公取族二十四骸與其親偕葬焉後生子元美登進士孫翰曾孫庭槐庭機元孫爍俱官至尚書公累贈一品封誥嗟乎觀林公之事彼獨私一已者庸可望其得地發祥乎

○責

善不納反成不睦。○兄弟大仇怨人與之交。○無故

貽累兄弟。

徵事

懷遠陳氏其弟名鳳好酒喜博破產

業至不能餬口其兄名龍故善士也頻周

之一日弟忽悚然曰我與兄同受先業而我乃如此累兄周給有何窮期真家門之罪人也遂痛自策厲



勤生嗇口。見兄有惠。輒涕泣不敢受。四五年後。業稍稍復。敬奉其兄甚厚。謂兄曰。弟因今日。益念昔時不肖。終身含羞。莫可洗釋。憂兄累兄。非一日。死見父母。猶將切責也。子孫傳爲家訓。遠近聞者。多警發焉。

### 三十過

#### 分產擇美推惡

**廣義**

近世兄弟。鮮不析箸。以薛包事望之。固常情所難。欲免檢

擇之過。嘗觀士夫家有善法矣。兄弟分產。幾分。集三黨尊長。美惡均配。祭告祖宗。卽於祠堂前。如部選掣籤。各自拈鬪領取。絕去猜疑。永無間言。此法最爲公正。昔張齊賢斷分財不均事。片時而決。得此意也。○真宗時。戚里有分財不均者。更相訟。又入宮訴。齊賢在平章曰。是非臺府能決。臣請自治。上俞之。齊賢坐相府。召訟者各問曰。汝非以彼所分財多。汝分少乎。各曰然。命具款。乃召兩吏。令甲家入乙舍。乙家入甲



舍貨財無動分。書則交易。明日奏聞。上大悅曰。朕知非卿莫能斷也。

◎巧心推諉難事

**徵事**

宋大明中。五丁發三行戍邊。彭城人孫棘弟薩

當行。坐違期法死。棘詣郡言。弟幼失母。母遺言必保全。不忍令當一門之禍。棘家長也。請代。薩自言二歲失父。長育賴兄。兄雖垂憫。薩何忍求生。太守張岱以棘薩各置一處。各報聽代。棘薩各欣然就死。岱表以聞。詔貸罪。後其家產紫芝。及連理木之祥。○長樂鄭氏偶殺人下獄。兄憫然曰。弟未有子。我當代之。自首於官。瘐死獄中。其子携母賣酒嶺上。母死。遇異人指山下地曰。白羊眠處。鷓鴣啼。此貴穴也。當出宰相。其子覓至一處。果值白羊起。鷓鴣忽鳴。因停其柩。天大雨。湧沙擁柩。生昭先登第拜相。夫事之難處。孰甚於諭死入獄。且弟自犯之。非一家公事也。而友愛之情。



真切如此。乃同有其分。而忍於推諉。用意則巧矣。其如良心已泯何。◎藏一怨不忘。待

弟之子同。從兄弟減半。

**增註**

凡言不忘。謂常懷怨怒。

不肯消釋。非謂有報荅之心也。

**發明**

袁氏世範曰。人

言居家久和者。本於能忍。然知忍而不知處忍之道。其失尤多。蓋忍或有藏蓄之意。人之犯我。藏蓄而不發。不過一再而已。積之既久。其發也。如洪流之決。不可遏矣。處忍之道。奈何。隨卽解之。不置胸次。曰此其不思爾。曰此其失誤爾。曰此其欠學問爾。曰此其所見者小爾。曰此其利害甯幾何。不使之入於我心。雖日犯我者十數。亦不至形於言而見於色。然後見忍之功效爲甚大。按此論。推究最爲精當。與功過格意恰合。錄爲處忍者告。固是一帖清涼散也。**廣義**李亦人曰。骨肉失歡。本於至微。而終不可解者。止由失歡



之後各自負氣不肯相下耳。有能先自下氣與之趨事與之話言。則彼此酬復豈不漸如平時。○自

已獨娶妻成立。親老家貧。不留念於諸弟妹。**發明**父

子衆。婚嫁恒不能均。一相繼竭力於一二長大之子。而以下諸季茫然莫措。夫手足一體。彼已娶者。其何以自安也。縱或限於才分。不遑佐其父以經畫。而不安之情。必有常切於中。而不能釋者。苟自謂當得。而於諸弟妹漫無置念。君子謂其已忍矣。一體之情安在哉。

**二十過** 小事不耐。致爭競不睦。**發明**唐主爲荆王元

諸子。尚可復有兄弟。不可復得。二語因流涕嗚咽。不能止。至性之言。洵足令人感愴。忽於兄弟之情者。特



未之念耳。**附錄**法昭禪師偈曰。同氣連枝各自榮。些些言語莫傷情。一回相見一回老。能得幾時爲弟兄。

又曰。兄弟同居忍便安。莫因毫末起爭端。眼前生子又兄弟。留與兒孫作樣看。◎分產意欲

**求多**。只指一舉念間。若果恃強橫佔。另計所值五十

錢一過。**徵事**至治中。真定有朱顯者。祖父已分

財。見羣從多貧。謂其弟耀曰。父子兄弟一氣也。可異處乎。乃會拜祖墓下。取分券焚之。復同居。延祐中。蔚州吳思達者。有兄弟六人。以父命析居。後兄弟產多破。父卒。治葬畢。思達告其母。會宗族。泣曰。吾兄弟同母。忍令苦樂殊異耶。焚分券合食。宅後柳生連理。人謂友義所感。愚觀古人事。若此類者。每不勝太息。兄弟而至分產。已非天倫盛事。而乃復有求多之心。推此一念。吾知其於彝倫間。將無所不薄者矣。**附錄**江



州朱原虛爲學究。有詩名。二弟在髫年。而父母繼沒。原虛私匿羅綺兩篋。又欲析二弟另居。一日鄰家降紫仙姑。原虛適在坐。乃曰。聞仙姑善詩。幸見教一首。仙卽舉。云。何處西風夜。卷霜鴈行中。斷各淒涼。吳綾越錦成。私篋不及姜肱布。被香原虛得詩。惶恐。乃厚待二弟。與之完娶。教以儒業。後二弟俱登科。事兄如父。語云。暗室欺心。神目如電。良足畏哉。

十過

見大過不婉勸。

兄弟之子同從兄弟減半。

徵事鄭

均兄爲縣吏。頗受禮遺。均諫不聽。乃脫身爲傭。歲餘得錢帛歸。以與兄。曰。物盡可復得。爲吏坐贓。終身捐棄。兄感其言。遂爲廉潔。見過不勸。必無淡愛積中者矣。

增註

按五十過中。已有云有失

不規矣。此條似爲疊見。然彼則專主讀書學問。故嚴



其責於尊長。且統終身而渾括其辭。若此條。與一過中小過不規則。就凡為事體言之。而又分晰夫一端一節也。仍鑒然。有別。細讀自見。◎兄弟和好。忽自矜其獨勞。自誇其

德惠致啓不睦之釁。

**徵事**

虞謹天性孝友。成化甲子。

捕父。憐其衰老。命謹代行。謹曰。父命也。安敢辭行。毅然就役。若忘其為從兄事者。尚書楊文懿公嘉其義。為之請。得免歸。歸謁從兄。無一德色。薛包諸弟求分財。異居。包不能止。奴婢引其老者曰。與我共事久。使令所熟也。器物取其朽敗者曰。吾素所服食。身口所安也。田廬取其荒頓者曰。吾少時所理。意所戀也。夫虞之代役。難於忘其勞。而無纖毫之芥蒂。薛之讓產。妙於泯其迹。而令受者以可安。昔之人有若此。彼矜



勞誇惠者。

自揣何如。

◎向人私摘短失。

**廣義**

向人私摘。固為過

矣。或猜疑其私摘者。恐

亦不免於過。袁氏世範曰。同居之人。須令曳履揚聲。

使人聞之。恐適逢議我。彼此生隙。然則雖議我。甚願

其不聞也。况未必議我而逆億

◎借物不應。

**增註**

此

之乎。愚意亦當準此例記過也。

◎借物不應。

**增註** 謂器用

物件也。世有操家而內為政者。往往靳惜之心勝。而

兄弟之間。乞借暫用。亦巧為之辭。以拒絕其請。此雖

世家大族。常或有之。其罪皆由婦人。未有丈夫而鄙

惡至此也。要之平日不誠諭室人。而致令薄於已之

同氣。不得謂非丈夫之過耳。若夫借財物而不肯應。

則格中未有云。漠視不恤。為三百過矣。愚故信此條

之單。

**增註**

◎於飲食饋問上發一誚責語。

**增註**

若兄

物而言也。

◎於飲食饋問上發一誚責語。

弟之子有



失禮。則可責。尊長之道。不妨然也。然亦須諒其情勢。少可耐者。便宜耐矣。

◎兄弟獨任一

大事不自返內慚。

**發明**

既惡其甘作庸愚。且可知其於兄弟間。必無推逸任勞之情也。

◎兄弟有不和睦者。不用意調釋。從中左袒。

**發明**

此家門不

幸事。不論曲直。總當婉爲調釋。不可助直攻曲。以激而甚。若反助理曲者。相凌悖情之甚。准欺凌例記過。恐猶爲寬其罪也。○聞鐘集曰。治國易。齊家難。蓋朝廷之法。可以行之於百姓。獨不能行之於一家。故不得不委曲處之。委曲二字。真處家之善術也。昧此者。家難頻作。骨肉成仇。達人當不如是。○袁氏世範曰。自古人倫。賢否相雜。或父子不皆賢。或兄弟不皆令。鮮有一家盡無此患者。雖神聖亦無如之何。譬如身



有瘡痍疣贅。雖甚可惡。未可決去。惟當寬懷處之。從容諭之。俟其自化。則胸中泰然矣。欲事事爭其曲直。終無了義。

**五過**

輕聽一讒。不察遽加責怒。

待兄弟之子同。

**增註**

胡

之也。

**徵事**

牛宏弟弼醉殺宏駕車牛。宏自外入。妻迎

謂曰。叔殺牛。宏無所怪。問但云作脯。坐定。妻又曰。叔

殺牛。大是異事。宏曰。已知之矣。顏色自若。讀書不輟。

◎兄弟有過。不能善誘。過

於切直致成嫌隙。

**發明**

兄弟規諫。此至情也。縱令過

於切直。亦本深愛使然。於此而成

嫌隙。罪惡實在聽言者耳。而功過格以爲違於委曲。化誘之方。特錄爲過焉。其亦春秋責備賢者之意歟。



◎暱於兄弟之情。徇私廢公。不愛以德。

**徵事** 李文節燕居錄云。余

弟自秀才至出貢廷試。余未嘗出一力。就教時。有友在銓司。暮過余。問弟不置。意甚厚。余辭以有數存焉。幸無留意。及選得邵陽。余教以官方。弟得士心。監司擬薦。而直指惡余。削之。旣而陞翁源。余爲索文憑於少宰。少宰訝余。何不相聞。可以善地處也。余嘗謂兄弟三人。二人有官。余復居此地。天下大官小官。俱吾家做了。子叔疑爲政不用。使子弟爲卿。季孫異之。況爲政而用者乎。余盖欲以公倡百寮。而弟恬然不言。不得善地。不愠。家庭間。語不及利。出京之任。皆自僦夫馬。辛苦淡薄。至於沒身。賢如我弟者。亦少矣。○文節仲弟布衣也。自家候公於京。方巾鮮衣。以見。公詢家事。及寒溫慰勞後。訝其巾服。因詰以所自。曰游泮



乎。納粟乎。抑九載乎。弟皆曰否否。公曰。既不出此。則誰不知李九我弟爲布衣。而顧易冠服乎。詰以原帽何在。曰。尚在袖中。公曰。仍冠此。毋徇俗也。弟奉命唯謹。夫以元老之弟。卽屬布衣。何嫌儒服。而公必繩以本等巾服。其弟了無難色。公弟之醇謹。正兩相成哉。○按文節公之待二弟。真所謂愛以德而不暱於情者也。抑愚又嘗觀世俗之兄弟敦睦者。輒或不揆義理。相助爲豪快之舉。自謂用情出力。而不知其愛而不愛者多矣。卽如上海一太學生。其弟亦由太學。考授州佐。適喪耦。覓葬地。已成交將葬矣。突有稱久遠原主者。詞說支離。其意不過有所覬也。怒其借題爲詐。峻絕之。致其人無狀。而生復助弟盛怒。必欲訟之官。由此連結不已。旣大費其人斃于杖。弟不久亦病恍見其人。隨卒。夫其兄發怒時。非不自謂手足之情。



切而相助以禦侮也。獨不思其人之圖覬者固有限之欲。第雖堅執在兄則又不妨從中寬解。苟少有以遂之。未必兵連禍結於後矣。乃兄弟一意。第且得兄而怒勢益張。遂勢不自主。家破而身隨之。兄之助弟豈非適所以害弟歟。誠能精讀功過格。其必無是病矣。愚得其事於目擊。有感於斯而附誌焉。○已

子與兄弟之子小有爭執。不辨曲直。各怙所生。

**發明**  
程母

侯夫人教子。當幼時與人爭忿。雖直不右。曰。患其不能屈。不患其不能伸。怙所生者。豈惟薄愛兄弟。甚非所以厚愛其子也已。

**三過** 任兄弟事不盡心。

小事一事三過。大事加倍論待。兄弟之子同曾註不能若已事。



者。卽謂之。不盡心也。

○聞兄弟急難。不卽赴援。

兄弟之子同。

增

飾情周緻。此其人。恐并不得照。不盡心之條。論過也。莫遂以卽赴爲能。遵功過格耳。

徵事

漢趙孝趙禮相

友。愛歲饑。賊據宜秋山。掠孝將食之。禮奔賊所。曰。兄

病且瘠。不堪食。我體肥。願代。孝不肯。曰。我爲將軍所

獲。死命也。汝何辜。兄弟相抱。大哭。賊感動。並釋之。夫

遇有急難。挺然殺身以代。且不恤。若趙禮之急奔賊

所。情何篤也。彼聞之。而無所迫切。抑

○兄弟異居。聞

或飾情周緻。其得謂之有人心者哉。

疾不候。

因有事免。

增註

疾小恙也。若疾而至於病。則

雖候之。而遲緩焉。仍準不候論過。

徵事

廣東

黃士俊敦篤孝弟。赴公車。途聞兄病篤。嘆曰。焉有急功名。而緩視胞兄之死耶。半途歸。萬歷丙午至京。夢



入殿廷拜高皇帝。帝曰：汝來耶？今首用汝矣。遂狀元及第。◎一二月不晤，不一念。

兄弟之子同從兄

◎無故加疾聲傲色。

**徵事** 夏邑陳

弟減等准一過。

世恩萬歷已

丑進士。兄弟三人，惟季弟好遊狎，早出暮歸。長兄規止，不改。公曰：傷愛無益。每夜親守外戶，待弟入手，自扃鑰，問以寒煖饑飽憂恤之情形，於言貌如是者數夜。弟乃大悔，不復暮歸。夫兄弟有失，尚不敢以激切傷愛，況無故而失其怡怡之情，其於待兄弟無義。其於自持無禮，莫謂其為小過也。**增註**觀上條出言切直，乃有故而發者，則以五過律之。而此僅列諸三過，疑為輕重不倫。然嘗細察人情，惟其有故，則激切之下，往往與人以難堪。中傷私情，遂為淡怨。其所關係大矣。若夫無故而偶有疾聲，一時任意出者，不覺受



者無怨憾焉。庸人無學問者。輒易犯之。不必若賢者之重其責備也。**廣義**白文此條。蓋渾言之。愚謂弟之加兄與兄之加弟。又各有別。若以弟言。無論有心無心。而所深戒者。惟傲之一字也。千古惡弟之著。無有如象。要之殺兄之說。皆屬附會。而見于堯典之可據者。亦僅舉一傲字耳。只此一字。不弟之罪。已不可追。而後世因得以甚其詞。所謂君子惡居下流也。然則傲者。非爲弟者之極惡哉。功過格于此少割斷之交。愚敢特申論之。并載一近事。傲天下之不弟者。○臨潼殷富弟貴。素傲不弟。嘉靖初死。三日復生。向兄叩頭曰。弟今不敢慢兄矣。兄訝問故。貴曰。弟被二卒拽赴城隍廟。聞殿上厲聲曰。汝何得慢兄。罪合杖百。猶鬼捽貴將杖之。貴大懼呼曰。貴愚蒙任性適意。不自知過惡。請自今痛自悔改。卽聞殿上曰。汝能改。姑免。



杖遂縱歸。見北街鄭優一家皆遭拷掠。又遇某秀才。謂有白金三兩。著草鞋中埋。楊下傳語其子取之。秀才子求諸楊下。果得金。亡何。鄭優闔門疫死云。

◎兄弟同居不好。

一日三

居兄弟。一月後無改悔心。爲十過。積久不改。逐月記

**過徵事**

崔孝芬爲人。孝義慈厚。愛弟無不至。相對必

溫容。撫問臨事。肫肫教導。惟恐弟之有失。弟孝。瞋奉

孝。芬盡恭順之禮。坐食進退。必孝。芬命。不命。不敢也。

鷄鳴起。卽往兄所候視。一錢尺帛。不入私房。吉凶有

需。聚對分給。諸婦亦相親愛。有無共之。按崔氏兄弟

與房氏兄弟相似。此誠各盡其道者也。假令偶有乖

違。觀此能毋亟愧悔乎。**廣義**家庭不睦。其大者。或因

責望太過。或聽婦女離間。固不待言矣。而其最易犯

者。或以性情不一。作事不齊。遂致不睦。此雖詩禮之



家。恒不能免。旨哉袁氏世範曰。父兄愛子弟。不必責子弟之必順。子弟愛父兄。不必責父兄之必慈。父兄子弟。各務自盡。而責望之病除矣。嚴禁婢妾。不許傳遞語言。其妻室有言。雖或中情。亦不可聽。而離間之端絕矣。至人之性情。或柔或剛。或謹守。或豪縱。或喜安靜。或喜紛更。臨事之際。一是一非。自然不同。惟各隨所宜。不因我是。求其必合。豈復爭執。卽或有偏僻處。不忍旁視。只宜平心和氣。婉轉勸導。如此而不睦者。吾未之聞也。◎同居遇一小事。規避不肯爲。

一過見小過不規。◎獨任一小事。有矜心。能禁制之者免。◎遇

正經事。婉言規勸。反生悲怒。

此指獨知之念言。若怒形於外。加二十倍。◎



善言相勸不聽。**增註**悲怒拒絕其言也。不聽輕忽其

之至愛。則一也。◎自己貧乏賴兄弟之子周濟反多

不滿意。一念一過。加責言者。一言一過。**增註**此條宜

周給。出於不得已。以是為待兄弟無情義。然在旁觀可施責備之詞。在當躬。惟懷感激之念。一絲一粟。豈曰非惠。自返無裨。益於兄弟。而徒以累兄弟之周給。方恤乎其不安。而敢有詬責乎。◎服喪不

誠。叅伯叔條。**徵事**謝述隨伯兄純在江陵。純遇害。述

奉喪還都。遇暴風。喪舟漂流。不知所在。述乘小舟尋求。嫂庾氏泣曰。叔去必無及。豈宜存亡俱盡耶。述號哭曰。吾兄極安全。尚須營理。如其已致意外。述亦



無心獨存。因冒浪而進。見喪舟既沒。述號叫呼天。幸而獲免。咸以為精誠所致。◎候疾無至

情。兄弟之子同徵事。王僧虔携諸子姪到郡。兄子儉中途得病。僧虔為之廢寢食。諸人或慰諭之。僧虔

曰。昔馬援子任之間。一情不異。鄧攸於弟之子。更逾所生。吾懷其心。誠未異古。亡兄之允。不宜忽諸。若此

兒不救。便當同舟。謝職言未畢。淚潛然下。聞者皆嘆息。儉疾尋即愈。◎手足至戚。用一

外交虛文。發明峨嵋山道人曰。兄弟間。不可作賓主態。蓋至親無文。至愛無迹。一飲一食。即加

謝語。是外之也。○第五倫自述。兄子病。一夜十起。退而安寢。子有疾。雖不省視。而竟夕不眠。謂不能無私

程子曰。不特安寢與不安寢。只不起與十起。便是私也。父子之愛。本是公。纔着些心做。便是私也。又問視



已子與兄子有間否。曰。聖人立法。曰。兄弟之子。猶子也。是欲視之猶子也。◎姊妹相見失

禮度近俗習。

**發明**

傳曰。男女不雜坐。不同櫬枷。不同

巾櫛。不親受。又曰。男不言內。女不言外。又曰。婦人送迎不出門。見兄弟不踰闕。此可以識禮度所在矣。



不食則死。凡婦人。不可不食。

又曰。婦人多愁。不出門。良良哉。

婦人。不可不食。不可不食。不可不食。

婦人。不可不食。不可不食。不可不食。

婦人。不可不食。不可不食。不可不食。

婦人。不可不食。不可不食。不可不食。



